

國
朝
文
匯

國朝文匯天集目錄

卷十七

成

穀字忍齋湖南湘鄉人道光十八年進士官岳州教授有求在我齋文集

宗法議

楷竹說

雜說四

書盾墨後

岳陽書院會課示諸生書

蔣烈婦傳

李孝婦墓志銘

馮桂芬

字林一號景亭江蘇吳縣人道光二十年進士授編修官至右春坊右中允有顯志堂集校邨廬抗議

五十自訟文

校邨廬抗議自序

似山居圖序

費樹臣飲馬長城圖小影序

一 二 二 三 四 四 五 七 七 九 九

書東坡范增論後

十

明徵士劉孝惠先生像題辭

十

公啟曹協揆

十一

皖水迎師記

十三

遶城會防記

十四

火林負母圖記

十六

高要忠武張公小傳

十六

馬中書傳

十八

張繼庠傳

十九

陳君傳

二十

葉節婦家傳

二十一

副將華爾小傳

二十二

龔生傳

二十三

功甫潘先生暨配嚴宜人合葬墓志銘

二十四

許宗衡

字海秋江蘇上元人道光朝進士

遊西山記

二十七

復黃生瑾甫書

二十七

張石樵先生別傳

二十八

記 雜

二十九

蕭唐卿傳

二十九

凌玉垣

字叔舟湖南善化人道光二十年舉人
工部七田司主事有蘭芬山館詩稿

遣四愁詩引

三十一

張玉夫孝廉聲玠新樂府題詞八首小引

三十一

周倬祥

字卿伯一字卓
人湖南湘陰人

比干論

三十二

嫦娥奔月說

三十二

國朝文匯丙集卷十七

宗法議

成毅

邑先正楊谷黃氏著家禮一編首講宗法簡錄程朱之說而斷之曰大宗主閭族之祭小宗主高曾祖禰之祭居必有祠祠必四世親盡則祧祖遷宗易一如古禮某愚竊以為宗法誠善然如黃氏之說及所引先儒禮經似惟諸侯大夫之有國與家者始可言之施諸士庶必有所不便也試詳言之古者有世貴有世賤貴者而不嚴之以分其勢必爭庶人無慮是也故貴者主尊尊尊故祭隆而喪殺賤者主親親親故喪隆而祭殺祭隆而喪殺故三廟五廟其勢愈遠而期功以下之服絕焉喪隆而祭殺故總麻袒免皆所必嚴而禰廟以上之祭絕焉貴賤之分各不相蒙是不可不辨也且自命士以上始有土田穀祿名位以相傳襲有土田穀祿名位以相傳襲則其力可以世世守之無廢先人之祀庶人受田於官百畝之入僅足自贍其身而已未聞國家別有所以厚於民之為父後者而獨責以敬宗收族於嫡長子孫不已難乎至於後世尤所不能百畝之田不能世世有之而庶人之所以遺其子孫之財與產又無獨厚嫡長之例數傳以後不能自存比比皆是而謂嫡長子孫能獨以土田穀祿祀其先人世世不廢有幾家耶即如宋明以來貴者得立五廟而朝廷無世

祿則其後必微。為宗子者。將必有絀於才力之時。且既推為宗子。則必賢智而且尊。優於族之人。必賢智則必教之備。必尊優則必養之厚。能必嫡長子孫。世世足以自贍也邪。不能自贍。則必族人代為之謀。此亦其所不可繼矣。且更舉古禮經證之。記曰。庶人無廟。又曰。庶人薦於寢。凡以庶人不能世世祀其先人。則薦於禴。嫡子主之。終其身。兄弟總命焉耳。此即漢詔所謂民為父後者也。今謂立大宗以主闔族之祭。百世不改。立小宗以主高祖之祭。五世則遷。是庶人皆得有廟。皆得祭。及五世以至百世。不顯與經戾乎。又古者治民之法。詳於周禮。族師比閭。鄰。鄭之長。讀法諄諄。何不聞屬之宗子。使治其族之政。令祭祀也者。又如令國民族葬。掌其政令者。為墓大夫。何不聞掌於宗子也者。則古宗法之未嘗行於庶人。其尤彰明而較著也。且宗子有君道。有君道則凡為宗子者。皆得臣。臣其伯父叔父伯兄及伯叔祖曹。今律論親屬。何第以尊長卑幼及服之疏戚為定斷耶。大抵言禮之家。每多泥古而不深求古人議禮之意。與夫後世時勢之所不可行者。不敢變而通之。無惑乎禮教之愈微也。吾鄉舊俗。族各一祠。祠擇一人以為之長。上主族之祭祀。下治族之教誨。揆諸禮制。并所不悖。而議者或謂體統未尊。及多不公不正。敗壞家事之人。汲汲援宗子之說。以為愈焉。然能必教育無素之宗子。定為賢智乎。似誠不如族人之所共擇而共推者。

之尚足以稱家督也。愚固以為宗法誠善而無如勢之有所必不行也。

楷竹說

虎臣諸子以嚴謹之筆寫小叢竹。細瘦不盈半筋。開以巖石。望之蔚然深秀。諦視筆意。脫勁而氣和。筆鋒著紙。廉利深穩。自署曰楷竹。其友人成穀見而說之曰。楷本木名。疎直疏秀。王次仲作正書。以此名之。後人專目近體為楷。其實籀文篆隸。竝是古人楷法。飛白章草。則又楷之變焉者也。人知易真書為飛白章草。則知易章草而為蘭為梅為松為竹。無二道也。推之凡作金碧樓臺。皴染山水。刻劃士女。鉤勒花卉。假令竝用楷法出之。如晉人作字。一波一折。具有精神。則其所為小品。必有逸適於常格者。然其事倍難。惟靜者心知其意。可以仿佛得之。大凡涉筆不得楷法。不足成家。極其微妙。與性情通知之。而必俟乎習。習之而必俟乎養。養之久而弗忘弗助。幾於自化。莊生所謂承蜩累丸解牛。皆是道也。推之琴。推之射。二者蓋與用筆同焉。皆可以觀道妙者也。而其法竝昭於嚴謹。是故君子之志於道也。則務為楷人。而其成必資乎學。

雜說四

士人服官。亦惟謹守朝廷法制禁防而已。然而法制備。禁防周。及其敝也。便於小人。而不便於君子。夫其所以為之法制。而禁防者。蓋曰君子恒少。小人恒多。則吾為之

定制而劃一之不問其人之為君子與小人也。行吾法焉已爾。顧事未有行之百年而無弊者。故君子循法而常不足以展其才。彼小人者則曰。法固如是而已。其得與失非吾所能知也。於時君子日勞。小人日逸。積之既久。形隔勢禁。相率舉其成法而盡弛之。小人乃漸奮其私智。越而軼焉。而轉足快人意。於是法制禁防乃遂不可問矣。且夫君子守其仁義之本心。則多所顧畏。即蕩然無所禁防。而其小心敬慎常若有所制焉。而不敢違。是惟聽其因事措置。不為限量。則思慮周密。操縱在心。即可隨其才之大小。任之輕重。而皆足以自見。今一切畧之以法。是即蒙昧之才。亦無異於庸眾。至於勢且不行。其事未必不可稍為變更。而不變者且隨而議其後。君子於此苟且遷就。救過不遑。故能軼法度而建功名者。往往不能得之於平世也。小人異是。彼其恣睢桀驁之氣。陰賊險健之智。營私自便之心。固皆足以肆然自為。則方幸吾法之密也。而知所以禁防之者止於是焉。此外不得而我議也。彼其私心所營度者。乃即常在吾法之內。而又習知法之所行。事必不濟。則且故為驅迫。或怠緩焉。以俟其法之敝。及其敗而思所以易之。不能而其桀驁恣睢之氣。陰賊險健之智。皆足起而中之以便其私。故凡君子之所由之。而重困者。皆為小人之所公然越之而不可以究詰者也。於是猾吏奸胥。行私罔上。牽纏輾轉。君子方將藉以苟且目前。勢且不可

得不相與為掩獲。故為君子所不便。而乃愈為小人之所甚便。然而吾於世之所謂君子。則猶有說。今夫善惡義利邪正公私之辨。此如涇渭兩水。判然不可相入。又如方舟並進。必不容以一身而兩御之。讀書之士。知自好者。十得八九。顧恒不能委曲成就此心。其終至於同流合污。而不克以自拔。無他。其術疏耳。夫當其閉門讀書。亦常習聞仁義忠信之說。然而確然有所自得。而遂從而謹持之者。蓋亦寡矣。而其精神。散散語言文字之外。無他及焉。則凡所為識人情。察物理。審時勢。如此而得。如彼而失。曲折變幻。近在日用耳目之間。而皆以此為非吾事。然且挾策干進。貿貿然來。亦既遂能得之。私願已足。且不自知吾身將為何事。夫由其仁義忠信之說。所習聞而既不可磨滅。喪其本心。而其所為禍福利害之說。持之不能自堅。及夫驟然身擲世務。則愈搖搖無所自主。是則清濁之界。固猶未能判然。先自劃定。而其才力又常不足濟之。何則。先時既未經歷世故。講明切究。則於一切譸張變幻之術。試之當前。茫然莫辨。於是而不顛倒俯仰。身為傀儡者。鮮矣。夫既傀儡登場。任其提掇。於是猾吏奸胥。皆得從而誘之。即皆得從而制之。而況乎法之所在。往往牽掣不盡可行。顧畏愈多。竭蹶愈甚。此其所以左顧右盼。相牽而出於一術也。然則君子始苦於自困。終斲於自快。則亦喪其從前所守而弗恤爾。且夫上之所以涖下。寡之所以勝眾者。

正直以持之。明通以照之。公溥以御之。使夫畏而愛焉。敬而服焉。故能語之而必信。令之而必行。禁之而必止。而後帥以從事。指揮如意。反是則異。是將何道以濟之耶。大率小人之尤者。其機必快。其手必辣。蓋由徑習熟。膽氣久壯。而又可以冒然公行。無所忌憚。夫欲小人有所忌憚。而不敢以冒然公行。此無望其發於天性。禁於憲典。直恃君子之才之足以取之耳。是故猾吏奸胥。所以敢於侮其主者。亦為有所嘗試。而知其人之易與也。而小民視此矣。是故服小人以德。御小人以才。二者缺一。不可以為政也。然則非盡法制禁防之足以困君子而便小人也。亦為未有裕乎其本以待之者。

書盾墨後

偶於諸君虎臣案頭得此編。意為幕府文檄。展而讀之。則湯子幼尊從事之暇。割記近事。搜討前聞。鑒往蹟而謀善後之所作也。體例本史家紀事。附以論說。其事核。其辭文。其意婉約而深厚。歸於安全之本。在良有司。偉哉湯子具史才矣。所舉為豁峒。為海疆。旁及越南外夷。皆東南重防。近或蠢蠢稍作不靖。封疆大吏。群起埽除。而湯子相與講求利鈍於其間者。夫國家承平二百年。法制禁防。周詳盡善。文恬武嬉。相安無事。習之既久。往往奉行文書。疏節闊目。譬如一身血氣充實。飢噉不作。則凡

暑雨祁寒。所以衛吾毛髮膚革之具。幾如都非所急。方夏而遺裘。經秋而忘葛。中智以下。大抵然矣。編中論峒搖之變。起於平時之積忿。成於倉猝之無兵。其用師也。責銳卒。不貴多調。山谷不利。采入其善後也。曰彈壓。曰撫綏。論海盜之作。由於奸獪。罷民內地勾結。其勦捕利於不動聲色。而詭圖之。防商漁接濟。謹守內洋。而弗逐之外洋。論鴉片之肆毒也。曰專絕。喚夷互市。練水師。嚴哨巡。以待其來。重創之。使自燬。凡此皆成法要領。深中竅會者矣。每事備考。史乘雜錄。及近時文檄。足裨聞見。而資檢核。語曰。前事者。後事之師。多讀書。而諳時務。則不疑於古。不昧於今。書生之言。豈其無補。如是編者。可為裘葛預備。而竝無煩屑。鼻之磨墨也。湯子諸君之友也。聞其年方壯盛。負著書之才。而有當世之志。又撇迹半天下。多識時事。則所以講求之。創記之。論說之。如是編者。必未有已。用書此歸之諸君。願因得盡觀其所著焉。

岳陽書院會課示諸生書

學者非徒以為文章已也。然自國家以經義取士。習舉業者。必務講明切究於聖賢所示。修己治人之術。內外精粗。遠近大小。縷析條貫。有以自得於心。而後可以操筆為文。言之有物。自來經義之最精者。即未有不與聖賢之學相浹洽也。然則今之時文。固即所以為學者也。雖其支分派別。不盡於此。而志士可以知所尚矣。大約其入

義理昭晰。心胸光明。則發之於文。隨其淺深厚薄。皆能確然有以自見。否則。偃蹇焉。晦塞焉。支離焉。此固操筆之時。所可自驗也。其入之也深。則出之也精。其求之也速。則應之也淺。是有各以其候至者。故學者。但宜因其材質。知所致力。勉勉循循。以求所謂自得。則得之矣。工夫甚多。綽有次第。患在苟且自安。與急遽躁進。而無序耳。故躁動者。常不得。而安靜者。得之。浮偽者。常不得。而篤實者。得之。粗淺者。常不得。而深細者。得之。蓋文者。言之華。精神之所發露。而學問。為之根柢者也。根柢茂。則發露必盛。而所以茂此根柢者。則又精神之所蘊結。學者。而欲從事於斯。所以持其志。養其氣者。不可不急講也。師友之益。大抵惟能導之以先路耳。故願學者。先自靜驗。確然有求。必得之志。而後師友之言。為有入處。蓋即時文一道。而所以檢攝身心。涵養德性。其堅固之操。裕練達之才。並在於此。此即所謂明體達用者也。此意亦惟諸生自喻之耳。今太守於書院造就之意。甚為切至。謂某於此道。差為不謬。俾領此席。而某亦竊聞同人往往。以為可資前途之問。某方自懼無所益於諸君子。然不敢不力也。諸君子。知必不負太守之意。期共勉之。

蔣烈婦傳

昔五代時。號州司戶之妻李氏。過開封。逆旅主人牽其臂而出之。李氏大慟曰。吾為

婦人此臂乃為人所執耶。遂引斧斷其臂。曰：不忍以一臂故遂污吾身。後世稱之。忍齋氏曰：吾乃今見之於蔣烈婦矣。烈婦者，吾從兄子也。幼無父，無母，無兄弟。適蔣龍翔。蔣之母於烈婦父為姊。憐其孤露，撫如女子。烈婦自幼即甚當母意。母故貧，早寡。與其二子居先人老屋。長子婦卒，遺一子。烈婦身字之。其同居之族姊，如姑姊妹輩，固皆以謂烈婦賢矣。蔣與翼者，無賴子也。於蔣母為再從姪。遇烈婦嫂呼之。與翼有母，有兄與嫂，與蔣母共衡宇。居西偏，而蔣母則處其東。其尤近烈婦所者，則為其族人婦萬氏之室。己丑某月日，與翼族母某以生日，假與翼宅為設賀客。萬氏期烈婦旦日往為壽。烈婦辭焉。時蔣母先攜幼孫適女家矣。夜，烈婦理紡車，與翼闖然入於室。烈婦怒，遽呵之。與翼強從，則幸萬氏奔而往也。見烈婦而反敗，氣結捶胸，不能一語。而與翼奮門跳矣。蓋與翼涎烈婦久，乃先以計圖龍翔戲葉子於外廳。且覷萬氏已出往客所，將牽總於女子之黨。一介弱女，撐拒呼號，固可以為其所欲為矣。而不虞烈婦之鋒卒不可犯。萬氏固未出，噉然一號之。遂聞聲而相救也。斯時則幸萬氏奔而往也。然而烈婦則素羞澀如處子。目逆之，輒頻頻重自珍惜其身。如素絲白練之不可點辱已甚。固不堪。又竊憤龍翔懦不能制與翼。遂乘閒遂自引決。時年二十有三。烏乎烈哉！獄上，烈婦邀旌典。或曰：烈婦可以忍而不死者也。烏乎生死之際。

大矣。苟非有所大慟於心。而為百端之所不可解者。即安肯以其姑婦相得。夫妻共愛之身。決然捨去。如敝帛哉。司戶之妻。誤牽其臂。忍而斷之。狂暴之辱。豈直牽其臂而已乎。臂汚而恥及其身。身辱尚可以洗滌之乎。臂汚而斷之。而身潔也。身辱而死之。而心潔也。此司戶之妻之志也。烏乎烈哉。然吾獨慨乎逆旅主人。誤引一烈婦人。臂而罪以笞。彼強暴者。千名犯義。迫人於死。聽斯獄者。方且得其情。而故宛轉求其罪。易他辭以坐與輕典。是豈所謂得麗於事者耶。吾恐長逝者私恨無窮期也。

李孝婦墓志銘

余門人李生釗。持李孝婦狀來請曰。此釗族人尚鸞之妻。國鏞國鏞之母。而雁壩翁之子婦也。雁壩翁二子。長即尚鸞。乾隆五十七年。鸞客蜀。孝婦與繼姑奉翁家居。翁病噎且劇。孝婦惶懼。計夫遠客不得歸。禱於神弗愈。孝婦益心憂。乃私剗股肉。雜糜粥以進。翁吸之能下咽。病日以緩。家人怪孝婦形容委頓。而衣有血蹟。詰之始得實。未幾尚鸞遂歸。言某月日夜恍惚有人促令急返。醒而悸。核其時。則孝婦剗股之日也。尚鸞歸月餘而翁卒。孝婦時年三十有一。又七年生子鏞。又四年尚鸞卒。遺腹生子鏞。孝婦撫之成立。以今道光二十二年壬寅三月日卒。距生於乾隆辛巳。實得年八十有二。卜今某月日葬於某原。乞先生志其墓。烏乎。如孝婦者。其真克以至誠。

格於鬼神者也。天之佑其身而使之有子也。宜哉。是宜書。孝婦姓劉氏。與尚駕竝臨湘人。今居巴陵。銘曰。

紀獨行。納諸墓。惟世世子孫。用永保享於千秋。

五十自訟文

馮桂芬

歲在著雍敦牂。余年五十。客曰。子學者也。昔遽伯玉行年五十而知四十九年之非。子亦知其非乎。余曰。子言誠是也。雖然。有非有未必非。不可以無辨。客曰。子何言之。憤也。伯玉三代上賢者。大聖人之友。猶知非若彼。子何言之。憤也。余曰。是有說焉。傳記所載伯玉事。年歲先後不盡可考。据左氏傳。初紀從近闕出。在襄公十四年。孔子世家再紀主遽伯玉家。在哀公三年。相距六十有八年。當是弱冠登朝。歷事獻殤襄靈出五公。其年五十。在襄靈之際。傳所記君制其國。誰敢奸之。侃侃正論。不與時相。孫林父甯喜為黨者。其事在五十以前無疑。從可知所謂知非者。蓋學問中精微之語。於生平大節無與。不然。以不黨時相為非。將以黨為是乎。且以伯玉之賢。亦何至四十九年之全非。而待五十之改弦更張也。知人論世。宜體此意矣。余何人斯。庸敢與伯玉比。顧亦有不肯妄自菲薄者。願為子一一陳之。生平居官未嘗於長吏求一差使。居家未嘗於當事進一闕說。未嘗受一賄人之錢。未嘗為一負人之事。天地鬼神實鑒臨之。前者被謗之舉。為民為國。開罪於權門勢族而不悔。亦庶幾不黨孫甯之遺意。以此為非。將隨波逐流為是乎。其不然明矣。承先人遺業。薄田十頃。衣食僅給。米鹽靡密。輒親為之。人或以善治生為非。願將不衣食乎。抑不求諸此。轉求諸彼。

如世之鑄橫財者為是乎。其不然又明矣。惟是妄念有未盡耶。機心有未忘耶。嗜欲或由強制。大廷是而有衾影之非耶。出入難免持籌。廉儉是而有恠畚之非耶。好名太過而矯矜之非耶。憂世太過而怨尤之非耶。是固不足言學問精微。而必宜知其非者也。雖然未已也。余好讀書。未嘗一日廢業。性迂未嘗與一曲譏。自謂無足奇人。輒交口稱之。余滋慙焉。至生平所自信者有二。操守第一。萬鍾千駟不能易吾節。吏事次之。少賤通知民情。留意掌故。二者竊自謂不居人下。乃人輒目為文學之士。不以吏事相許。至以非義之取嘗試者。斥甲而乙。至斥乙而丙。蓋自通籍二十年。雖漸久漸稀。而終不能絕。以汙於今。何與生平所自信者適相反也。柳下惠曰。伐國不問仁人。吾豈有遺德耶。然則身之不修。行之不立。聞望之不足孚於人。可知也。此尤無形之非也。勉之哉。自此以往。若輩絕迹。此心昭然大白於同人。則吾學之進矣。若前者被謗之舉。則雖身修行立。聞望孚於人。滋之不免也。必欲免之。則必入於非而可。吾所謂有非有未必非者如此。客悅曰。然則子真知非者也。客退錄為自訟文。置之坐右。

校邨廬抗議自序

三代聖人之法。後人多疑為疏濶。疑為繁重。相率芟夷屏棄。如弁髦敝屣。而就其所

謂近功小利者。世更代改。積今二十餘年。而湯馬泯焉矣。一二儒者。欲挾空言以爭之。而勢恒不勝。迨乎經歷世變。始知三代聖人之法。未嘗有此弊。夫而後恍然於聖人之所以為聖人也。試略舉數事言之。以億萬人自養。則有餘。以一人養千百人。則不足。觀於今日奉軍國。則民力竭。養兵勇。則國力又竭。而始知聖人兵農合一。車徒馬牛甲兵。出自民間之法之善也。取士。何以始澤宮射御。何以登六藝。觀於今日文臣不知兵。武臣不曉事。而始知聖人文武不分之法之善也。什而取不及一。視古為少。倍蓰而當一。視古轉多。觀於今日倍征無藝。而始知聖人百畝而徹之法之善也。土宜出於地。而無窮。達物限於地。而難致。觀於今日運道阻。天庾空。而始知聖人四百里粟。五百里米之法之善也。食為民天。有食斯有民。水為穀母。治田先治水。觀於今日水利塞。稻田少。民受其饑。而始知聖人盡力溝洫之法之善也。世之盛衰。在吏治。治之隆汙。在人才。觀於今日科目不得人。而始知聖人鄉舉里選之法之善也。鄧治必先親睦。百行莫先孝弟。觀於今日期功陌路。富貴貧賤不相恤。而始知聖人宗族得民之法之善也。廉遠堂高。宴疏有禮。九重萬里。呼籲誰聞。觀於今日諫諍設專官。民隱不上達。而始知聖人懸輶建鐸。庶人傳語之法之善也。權所屬。則束秩亦將逞志。用不賤。則中材不能無求。觀於今日奉薄官貪。而始知聖人分田制祿之法。

之善也。天下有億萬不齊之事端。古今無範圍。不過之法律。觀於今日。則例猥瑣。案牘繁多。而始知聖人不鑄刑書之法之善也。開邊拓土。石田不耕。長駕遠馭。鞭長莫及。觀於今日。夷患不已。而始知聖人守在四夷之法之善也。術業以不專而疏。心思以不用而鈍。觀於今日。器用苦窳。借資夷裔。而始知聖人梓匠名官。倉庾世氏之法之善也。此類尚多。更僕難數。然則為治者將曠然大變。一切復古乎。曰不可。古今異時。亦異勢。論語稱損益。禮稱不相沿襲。又戒生今反古。古法有易復。有難復。有復之而善。有復之而不善。復之不善者。不必論。復之善而難復。即不得以其難而不復。況復之善而又易復。更無解於不復。去其不當復者。用其當復者。所有望於先聖後聖之若合符節矣。桂芳讀書十年。在外涉歷於艱難情偽者三十年。間有私議。不能無參以雜家。佐以私臆。甚且屢以夷說。而要以不畔於三代聖人之法為宗旨。志此者有年。一官無言責。懷欲陳之。而未有路。乃者鄉居。偶一好事。創大小戶均賦之議。輒□□□□□固宜絕口。不挂時政。重以衰病遠巡。無用世之望。懼遠泯沒。爰以避地暇日。筆之於書。凡為篇四十。舊作附者又二。用後漢趙壹傳語。名之曰抗議。即位卑言高之意。明知有不能行者。有不可行者。夫不能行。則非言者之過。而千慮一得多言或中。又何至無一可行。存之以質同志云爾。

似山居圖序

錢翁觀濤家江陰屋後有土山廣十數步高二仞顏其居曰似山遂作似山居圖小影以示客客有難之者曰天下之山多矣何取乎似而山之圖又何山不可似何取乎似中之似而圖之翁何樂乎似而遺其真也翁雖然曰客其猶有墟之心夫夫天下之真似有定乎哉代輿圖嶠之屬既不可得而至其可至者若嵩華終南天台諸山遠或數千里近亦數百里好事之士有其志矣或無其力有其力矣或無其時有其志有其時至矣而不能深或不能偏深矣偏矣而終不能久也裹糧襁被信宿旬日而去翠微回首過眼烟雲真者安在耶固不如吾似山居之幻巒嶂於目前攬林泉於几席朝斯夕斯而可據為己有也且天下何事有真似乎哉脣節旄參鼎鉉其貴顯乎布衣伏處妻孥怡然庸詎知非貴顯乎擁倉箱羅金貝其富厚乎夏葛冬綿左餐右粥愔然自足無求於世庸詎知非富厚乎睖驚駕鶴吸霧乘雲其神仙乎晏起蚤寢百年無事胸無身家之累體無癘疥之苦庸詎知非神仙乎吾安知真者之非似乎吾安知似者之非真乎吾安知似真真似之果有似果有真乎客獨不見夫論畫者乎其佳者必曰似真及遇乎其真則又曰似畫然則天下之真似果有定乎哉即如山真境也吾之山真中之似也圖似境也吾之圖即景寫形庭榻相向又似

中之真也。真乎似乎。吾烏乎辨之。吾以寄吾意而已矣。學問之道。惡乎似。以其亂真也。涉世處境之道。貴乎似。以其近真也。此即老氏無為莊氏齊物之說也。而於孔顏疏水簞瓢之義。亦無礙焉。翁之言如是。圖成問序於余。余因書以歸之。

費樹臣飲馬長城圖小影序

吾友同縣費潤森君。喪其賢子茂才德元。既殯。檢遺篋。得飲馬長城圖小影。重加裝潢。以付其孤。延曾世寶之。揮淚示余。屬為之序。蓋茂才北行紀游言志所作也。攷飲馬長城窟行。樂府解題云。魏陳琳辭言秦人苦長城之役。是為秦之長城。廣題以自代。並陰山至高關者當之。則又為趙之長城。茂才戊午應京兆試時。世父仙洲刺史宰曲陽。紆道省之。曲陽在居庸紫荆倒馬內三關之南。距倒馬百二十里。茂才所歷實燕之長城。長城之名不一。其為扼塞同也。至歌行之作。自魏晉訖隋唐。不下十數家。或為思婦之詞。或為苦役之詞。或為雜軍威勦遠略之詞。茂才懷抱利器。鬱鬱無所試。遭際時艱。胥疏侘傺。蓋不勝其投筆請纓之孤憤。於是圖乎紆之。梁徐幹詩云。少年負壯氣。耿介立衡冠。懷紀燕山石。思開函谷丸。茂才有馬斯其寄託。更有出於前人諸作之外者矣。洎庚申之難。茂才侍親避地。泝大江。渡洞庭。浮三湘。間關數千里。側身波濤烽燧之中。游蹤益奇。經思益險。聞見益擴。詩亦日以工。體則日以肅。既

歸之三年。遂病下血卒。時同治九年夏四月二十有六日也。年三十有二。茂才之游庠也。於同袍中年最少。學使為余及門奎通政章。奇其文。試畢。令入謁。期以遠到。嘗為余稱其名而擊賞之。乃浮沉黷庠十有六年。會軍興。輟試。僅三與南北闈。已未。倪得復失。遂以諸生終。平生飲馬長城之雄圖大念。一旦齎以入地。知與不知。無不扼腕歎息。君摺撫遺詩。得三四百首。將刊行之。又於枕下得自輓一聯云。幸大節無虧。小算得同顏子。痛親恩未報。兒心更慘。暴魚附留別一律。語極肫摯。吁。可悲也已。

書東坡范增論後

異哉東坡論增去羽當以殺宋義時也。東坡未知增之為人乎。蒙則以為殺宋義增本謀也。何以證之。證之鴻門之會也。殺宋義殺沛公一也。羽忍於宋義。忍不忍於沛公。天也不然。三人同受命懷王。義忽見殺。增能自安乎。東坡謂義帝必不能堪。非帝殺羽則羽弑帝。蒙謂增必不能堪。非增殺羽則羽殺增。增不能殺羽。增固能去羽。增之不去。增之本謀也。然則宜於弑義帝時去乎。曰。增項氏私人。其言曰。奪項王天下者。必沛公也。於義帝乎何有。曷為以此去。然則增亦與弑乎。曰。天下未定。先取不義之名。貼沛公口實。增之智不為也。東坡謂非增意是也。羽剛愎屢失策。類非增謀。可。以此入增乎。然則增當以何時去。曰。至是而楚漢興亡之迹始大著。增之去當其時。

矣。

明徵士劉孝惠先生像題辭

甚矣論人之難而人生大節所關未易言哉。語曰：時危見節義，其說是矣。而意殊未盡也。居乎慷慨激昂，矜尚氣節，一旦有變，從風而靡者，無論已。乃有挺身不屈於萬死一生之地，僅乃得脫，洎乎變故迭出，忽幡然變操，前後若兩人者，又何以說。讀明史至天崇之際，可謂多故矣。端竊肆毒，奸相樹門戶，馴至流賊陷京師，以汔王師南指，戎衣大定。其間如輩，增惠世揚之徒，方其攫逆奄，抗權姦，犯顏諫諍，刀鋸在前，鼎鑊在後，曹不少憚，矯然以清流自命，真若可信。卒之身敗名裂，為天下笑。烏乎！晚節末路之難，蓋如此。吳縣明徵君孝惠劉先生，羽儀少與周忠介公友善，忠介被逮時，諸生王貞明等十數人，抗言巡撫毛一鷺，請以民情上聞，不可，則直斥其黨奄奸狀，皆坐除名禁錮。先生其一也。奄敗，復其衿，尋膺薦被徵北上，不得志，歸隱縣之鄧尉山。鼎革之後，雞髮令下，遂為僧服以終。詳徐氏侯齋所為墓志。武子所為傳中。夫子曰：國有道，不變塞焉。強哉矯。國無道，至死不變。強哉矯。其先生之謂乎。先生以草莽孤臣，坎坷不遇之身，晚際新朝，嘉言罔伏，就使來時利濟，一舒懷抱，初於名德無損。高廟詔修載臣傳，通籍勝朝者，皆入焉。未授官則否。國朝名臣如魏文毅魏敏果諸

人皆明才也。君子未嘗以為玷。乃先生不屑為此。由先生之志。雖與首陽比烈可也。考王貞明亦歸命我朝。為校官數年。以視先生。有慙色焉。先生墓在支硎山。歲久有侵之者。道光庚寅。若干世孫某請於韓尚書對等。告之官。釐正其界。立碣志之。越十七年丁未。某繪先生遺像。附錄乙酉七月先生七十壽。同社及諸弟子所為。綴辭於後。並徵諸文士賦詩紀其事。述祖德。誦清芬。甚盛事也。桂芬樂為之。弁言簡端云。

公啟曹協揆

天禍吳民。陸沈一旦。焚燒夷戮之慘。遠接宋建炎四年金阿朮之禍。為吾吳七百有三十年未有之大劫。然阿朮自南而北。五晝夜即去。如疾風暴雨之一至。非若今日之賊之窟宅。踳踳兩年之久。而未有已也。幸先帝聖明。睽然於江南天下之重。舉而昇之執事。是天未絕我吳民之命。而使執事更生之也。惟是措置必規大局。攻取務求萬全。移兵則形勢不宜。分兵則調遣不足。執事遠猶碩畫。所見者大。某等具有一知半解。不勝欽佩。故一年以來。未敢輒以浮詞。輕瀆清聽。近謗鋒車收復安慶。沿江州縣次第肅清。前驅已達蕪湖。聞者無不額手稱慶。翹首跂足於旌旗之至。不獨某等私幸已也。夫三郡財賦之衍沃。兩年倒懸之困苦。萬戶壺簾之悃忱。凡茲皮傅膚受之說。執事心知而飲聞之。概不敢以進。惟是江蘇今日之情事。有可乘之機。而不

能持久者三。有僅完之地而不能持久者三。敢為執事陳之。一曰鄉團。去年各城被陷。鄉團抵死拒賊。有相持至數月之久者。以蘇府言之。永昌徐佩瑗黃土橋馬安瀾其尤也。所居在蘇州常熟之間。縱橫三十里內。水陸勇數千。附近鄉團一呼四應。不下數萬。嗣受中丞密檄。與送款之賊首熊國荃約盟。而壁壘如故。大軍一至。必可為邪許之助。遲之又久。萬一事洩。則糜爛及於鄉黨。故屢請此間進兵。不應。則流涕以去。此不能持久者一也。一曰槍船。江浙間向有之。船小而行捷。槍準而心齊。其始弋鳬鶩為業。繼為開賭演花鼓戲之淵藪。官不能捕。軍興轉受雇防堵。吳江臨其渠沙鍋阿四者。死難。次渠費玉孫四喜亦受中丞密檄。覘賊各船來往。賊忽屢為賊患。賊畏而招之。許不蓄髮。出入賊中。陽陽如平常。此輩顯持兩端。而一狎於寬大之政。一戀於毛土之恩。實委心於我大軍。一至。必可為嚮導之助。惟賊明知彼之不為用。而羈縻之。彼亦明知賊之不相容。而暫受其羈縻。日復一日。必且中變。此不能持久者又一也。一曰內間。聞賊中送款中丞者不少。蘇州李兆熙至以母子為質。春間李大舉來犯。先期而漏師。交綏而旋遁。當非無因。大軍一至。或可為倒戈之助。遲之又久。亦必中變。更易賊將。益復牢固。不可收拾。此不能持久者又一也。然此猶其小者也。請言其大者。此猶其虛者也。請言其實者。其數亦有三焉。一曰有兵無餉之鎮江馮

鎮軍子材所統多張忠武舊部。艇船等水師亦號稱勇銳。賊兩攻之。輒大敗。今揚通一帶安堵。固由賊志在南不在北。亦未始非鎮江障蔽之力。及今而大軍一至。可保全之。以為北路一面之師。然餉欠鉅萬。孤城無依。兵心已搖。潰可立待。此不能持久者一也。一曰兵單餉乏之杭湖兩郡。為賊所注意之地。兩年來以全力制之。乃靈光歸然。百撼不折。可謂難矣。及今而大軍一至。可保全之。以為西南一面之師。然精銳無多。師久而老。仰給過鉅。餉久而匱。比聞蕭山紹興相繼不守。四面受敵。文報不通。湖州更逼賊氛。四鄉瓦礫。幾無人烟。若無援師。終於潰散決裂而後已。此不能持久者又一也。一曰有餉無兵之上海。上海為餉源重地。江浙餘燼所萃。商民輻輳。兵籍數萬。可恃者不過數千。及今而大軍一至。可保全之。以為東路一面之師。且可籌備水陸糧餉。然勢居下游。無險可扼。最爾之區。孤懸浮寄。數十里外皆賊。兵勇雖多。或為近地游民。選懦而不能前驅。或為大營潰勇。獷悍而不知循律。雖孫吳復生。亦不能為功。幸賊不大至。視息偷安。日復一日。總非長策。此不能持久者又一也。由前三者言之。果使大軍破金陵而來。即鄉團盡散。槍船歸賊。內間無聞。不礙其為破竹之勢。由後三者言之。則金陵既下。賊且徜徉南徙。自兩浙而皖南。而西江。繞出上游。甚且蔓延江北。以躡大軍之後。而執事自西北控東南之議。不復可行。恐颶風沐雨。正

無已時。而吳中之果能出水火而登社席。尚在可知不可知之間也。某等借箸籌之。及今三兩月之內。可乘者未盡潰散。僅完者未盡決裂。但請奇兵萬人。以一勇將領之。間道而來。旬日之間。蘇常唾手可得。大軍一至。則朽株枯木。亦助聲威。大軍不至。則鐵郭金城。將淪灰燼。及今不圖。後悔必矣。聞大軍以一軍圍蕪湖。以一軍趨甯國。上游布置已密。所謂奇兵萬人者。宜由江北渡福山。襲常熟。或由長江直薄江陰。以執事之威。挾疾雷迅霆。從天而降之勢。各路兵勇民團。人人奮發。內外應合。即一萬可抵十萬之用。一面檄鎮江兵。南攻丹陽。西次高資。檄揚州兵。截江要擊。檄艇師沿江助戰。為北路之軍。一面檄寶山兵。攻嘉定。松江兵。攻青浦。為東路之軍。一面檄杭州兵。攻嘉興。湖州兵。由太湖復宜興。以會甯國之師。為西南路之軍。同時大舉。下游各賊。必將自亂自潰。執事堂堂之陣。正正之旗。由蕪湖太平。以薄金陵。雖有智者。不能為賊謀矣。肅清江南。在此一舉。昔梁王僧辯敗侯景。景奔吳郡。僧辯遣侯瑒追之。景南趨嘉興。勢復熾。幸趙伯超力拒之。乃退。奔松江而死。明祖平吳。廖永安先以偏師入福山港。徐達常遇春。自宜興入太湖。趨湖州。守將李伯昇降。嘉興松江繼降。然後進圍平江。二者皆上游進兵。殲賊吳地之證。然皆先以下游一軍牽制之。如出一轍。傳所謂譬如捕鹿。晉人角之。或人荷之。與晉拮之。是也。敬陳易說。願執事米擇焉。

至師行以糧食為先。執事拔營有日。即飛札吳方伯預為籌備。方伯善籌餉。一以委之。必不貽誤。昨已牒陳大略。頌之。聖主其有奏牘所不能盡者。觀樓如右。特遣錢戶部鼎銘齋呈。屬以包胥秦庭之事。願聽執事無衣之賦。如不得命。江南億萬姓從此死無日矣。惟執事進退之。

皖水迎師記

咸豐十年夏四月丁丑。粵賊陷蘇州。布政使薛公煥適駐上海。推巡撫上海道吳君煦兼署布政使。當是時。江以南各城相繼陷。北惟鎮江以提督馮子材率張忠武舊部固守。賊不得逞。南惟上海松江寶山奉賢南匯川沙金山等數城猶完。而上海以撫藩所駐。稱重鎮。六月賊十萬犯上海。城中兵才千餘人。方伯習於夷。以利害說之。欣然許助。順顧夷亦無兵。括洋行捕役數百人。飛輪調天津兵數百人南下。七日至賊甫入境耳。則分兵入城偕守。七月乙未。賊薄城圍西南隅。戊戌夷人以測量法。得偽忠王及賊目營所在。用開花礮擊之。六發皆中。偽忠王傷馬。賊無以窺夷人虛實。乃退。顧賊嗣是擁眾數十萬。馳騁蹂躪於浙東西千里中。陷城無虛月。勢益張。江浙子遺無不趨上海。洋涇之上新築室。縱橫十餘里。地值至畝數千金。居民殆不下百萬。商賈輻輳。釐稅日旺。官中益得以招將募勇。逾年兵至五萬四五千。然皆市井無

辦或竊盜或通賊賊窺伺日益甚。每至我兵輒潰。賊猶以十年七月之事不深入可。用者獨常勝一軍。顧經費十倍。故所募僅千人。足守松江而已。余以十年冬十一月。自洞庭遷上海。鍵關居城中。時同郡閣學龐公鍾璐以團練大臣駐馬。刑部郎中潘君曾璋丁憂湖北鹽道。顧君文彬咸與其事。十月。潘君自京至。其明年九月。顧君始自楚來。輪船至時。

欽差大臣湘陰曹公已克安慶駐軍。公弟國荃值江東討。及於蕪湖。顧君見余曰。滬兵其殆哉。不壁壘。不訓練。行無步伍。出無支應。將何以戰。遂首創乞師之議。具言在楚時知曹兵可用。可分援。余然之。以告潘君。亦然之。相與議曰。此事有三難。一則中丞不許也。迎師必具餉。權在官不在紳。以己為不能。以人為能。人情之所難。一則夷官不許也。前年夷與賊不相知。今互市已久。有兩不相幫之說。肯賃船載兵。顯然助我乎。一則曹帥不許也。曹帥老於兵。計在持重。驅兵入敵國之舟。暮越賊巢。涉重洋數千里。不知者將以為口實。曹帥能不疑乎。雖然。固當竭我輩力謀之。其成。鄉人之福也。不成。天也。又議曰。可與方伯中丞言者。莫如太守吳君雲。此事不得太守不可。兩君要余偕詣之。余時謝一切客。而於太守則推故。始購冠履。從兩君訪太守言狀。則大喜曰。君等言皆是不言。吾固將言之。是誠在我。雖然。非可旦夕行也。或旬或月。

宜有以報命。太守先告方伯。方伯曰。此今日第一策也。派員惟命。具資惟命。乃以問言於中丞。中丞難之。會賊朝暮入犯。各界防兵潰者接踵。中丞頗以為憂。太守遂言之不已。乃曰。吾豈不願為。恐曹帥不我許耳。太守於是報曰。事諧矣。以告閣學。亦許之。遂定議。中丞與閣學各修書。遣員偕行。閣學難其人。將郵寄書。余力爭曰。是輕其事矣。必不可。且愚以為此申包胥勸蘇之任。宜重其選。因薦無錫華大令翼綸。閣學不許。繼薦太倉錢主事鼎銘。許之。且以函葉見慶。辭不獲。稿成。授錢君以往。列閣學等六人。余以不與公事不列。十月之望。錢君謁曹帥於軍。曹帥得書心動。錢君又樓述上海將怯卒情。旦夕不可恃狀。繼以慟哭。公惻然曰。君休矣。以偏師遠涉上海。於法為奇兵。非正兵。顧事誠急。不可以常論。吾為君破格。乃與令中丞合。肥李公謀。李公忻然請行。而軍中果有以乘夷船越賊境為疑者。異論蜂起。公一不聽。遂以李公總統蘇軍。程君學啟從行。率兵一萬南援。檄方伯會紳具餉具舟。時滬上新設會防局。應刺史賢時與夷官朝夕見。方伯以具舟事委之英國領事麥華陀。不許。刺史說繡輝阿查哩與俱。告提督何伯。則大悅。刺史復以多金囑洋商。願承者。又與約船中。得增罷治餐。驢馬軍械。得入船。抵皖泊舟。聽行止。一一如我法。皆輪船創格。則刺史力也。計值二十萬五千金。方伯召洋商貸金如數。議已定。中丞欲罷之。詎方伯會

紳復曹帥。以費鉅。請改由陸。方伯單之不得。時潘君以會防事北行。顧君謂方伯曰。事敗垂成。烏乎可。雖然。督撫等耳。中丞移書曹帥。即檄公勿行者。不能不從也。方伯請之中丞。不許。方伯退。意猶豫未決。顧君曰。行也。此何時。畏中丞白簡耶。中丞欲罷之。不自言。乃使某等言。某等方將請之。何為罷之。某等遵督檄行事。中丞何辭以劾我。即劾我而舟已發。事已濟。又何求。行也。方伯又詣中丞。具道顧君意。甚決。中丞曰。資將安出。方伯曰。顧某任之。中丞瞋目曰。顧某有此力耶。方伯曰。貨之洋商得之矣。中丞默然。遂發。時余與顧君同居。親見其日詣方伯署。必昏暮歸。歸必憂憤。太守刺史奔走於撫藩之間。無虛晷。凡決辰始定。比抵皖。方以待輪船不至。議改陸。至則大喜。遂以同治元年春三月。李公統大軍至上海。是役也。余所代同人撰乞援書曹帥善之。因是介錢君招余入幕府。余辭焉。越三年。謁公金陵。猶縱言及之。曰。厥後東南事不出君一書。亦一段文字緣也。

滬城會防記

咸豐十一年冬。迎師議甫成。賊日夜出兵犯松江上海。華爾守松江。賊不能攻。遂全力趨上海。我防兵之星羅密布於金山嘉定青浦各境上者。凡二十餘軍。眾四五萬人。賊至不約同潰。入夜境上火光不絕。人無固志。夷人外為兩不相幫之說。內憂賊。

至。即貿易之事。輒助順而不肯自言。其酋巴夏禮屬所識某道指於應刺史賢時。且曰。官無可與言者。為語諸紳。忍棄上海乎。刺史介潘君達於閩學龐公。龐公曰。吾職團練。夷務非所與也。不敢聞命。退與同人議。有謂非美名者。潘君曰。吐蕃回紇沙陀古人用之。不以為疵。今顧以為疵乎。有謂後患可慮者。君曰。前年七月嘗為之。未嘗有後患。且後患之有無。實不在借兵與否。有謂索費且無已者。君曰。有先與價之一法。夷不致無信。議者無以難。顧終不謂然。甚且口稱不可許。為名高。心實欲潘君之許之。效則享其安。不效則議其後。故無一人正言宜許之。亦無一人正言宜拒之。議竟日不決。君訪於余。余曰。此兩言決耳。我有可守法則勿許。我無可守法則許之。君曰。防兵盡矣。安所得可守法乎。余曰。然則一不許。即無上海。皖上援兵且至。蘇州之復。未必無冀。無上海又安所冀乎。且彼以好來不許。是怒之也。必聽賊至。甚或引賊至。以洋涇為界。如劉麗川舊事矣。許之勿疑也。以告吳太守雲。顧君文彬。見皆同。太守以白中丞。中丞曰。出自紳意則可。吾意則無是。於是四君為期日擇地與巴夏禮相見。詞氣頗傲。四君侃侃無所紆。巴夏禮亦不忤也。遂定議。紳士呈請中丞入奏。疏稿至。即發兵。潘君等呈入。中丞曰。蘇紳盡是耶。某某何以不與。謂潘君連祁及余也。初乞援之役。余兩人即以久不與公事不列名。非有他也。重達中丞意。念所以塞

貴者。溫宗丞孫深居浦東二百里外。余子芳緝師也。令放懼請之。宗丞許焉。無何殷詹事兆鏞丁憂至滬。潘君曰。呈無詹事名。猶之不諧也。逮余偕訪詹事。坐定。余曰。君知余兩人所以來乎。曰不知。曰將為江浙億萬生靈請命。在君一言。詹事默然入室良久。持一紙出示余。則是夏在都請斬已夏禮疏也。余曰。彼一時此一時也。何害。具道宗丞首列一切狀。詹事許之。於是署名者得十餘人。又偕潘君遵祁詣中丞。白不列名之狀。中丞始入告。且檄設會防局。以四君主之。當是時。賊已陷杭州。別股由乍浦入犯。十二月庚午陷奉賢。明日陷南匯。又明日陷川沙金山。賊幟達於黃浦東岸。隔一水。西南賊亦距城十里。於是江灣軍亦潰。我遠近防兵二十餘軍四五萬人者盡矣。既設局。夷人出示略云。有人自稱某天義某天安汪何等四姓。以文來云。率兵若干萬。將到。不知何許人。上海為本鎮駐守之地。有來攻打者。痛剿不赦。大書高揭。遠近殆徧。賊聞之竟退。歲除烽火寂然矣。其明春賊陷甯波。與夷約以北門外城河為界。果如余言。上海之不為甯波者幾希。是記成以示客。客曰。此事或謂然。或謂不然。盡勿記。余曰。吾以紀實也。無此一舉。上海必不守。皖兵必不至。蘇州必後金陵而復。且有蘇州之援。金陵更不易復。東南大局必且一變。然耶。不然耶。公論在天下。諱之何為哉。

火林負母圖記

火林負母圖者。紀孝子崑山杜先生紹哲事也。先生生期月而孤。家貧甚。生母張孺人苦節撫孤。迄於成立。居邑城甲子里。兄弟五人。畢婚宅隘。次兄紹基分居營家術。相距半里許。歲時迎孺人就養。鄰人不戒於火。紹基適他出。時漏三下。天大寒。先生聞。亟披衣赴之。至則火逼孺人所居樓。救火者數十百輩。衝巷為梗。塞火光燭天。聲如沸羹。先生突入稠人中。冒烟焰排闥登樓。抵寢所。孺人方踰跚牀榻間。於是年八十餘矣。畏寒溢行。步意耆如也。遂負以下。出於戶。而樓旋燼。燕及衣履。時嘉慶十有四年冬十二月二十四日也。既出。母子俱無恙。傳記每稱純孝之感。類能迴風反火。信矣哉。嗣是孺人滋益衰。不離牀蓐。晨夕侍奉。食飲不解帶寢。輒累旬。越五年卒。哀毀骨立。見者憐之。道光十有六年。邑侯舉先生鄉飲賓。又八年卒。先是邑人僉議以孝子舉先生固辭。既卒之二年。始署行事。上之有司以聞。詔旌其閭。先生篤友愛。事長兄如父。早鰥不娶。家貧衣食節縮。而祭葬必盡禮。生平語及母氏。輒嗚咽泣下。蓋其孝根天性云。令子彝於桂芬為同年。熟聞先生至行。為記之以弁於圖端。

振威將軍 贈太子太保一等輕車都尉世職霍羅琦巴圖魯幫辦軍務江南

提督高要忠武張公小傳

公姓張氏名國樞初名嘉祥廣東高要人年十有五賈廣西貴縣三載為土豪所辱怒率眾毀其家官名捕亡命為群盜盜有道人為之語曰濟弱鋤強張嘉祥撫部勞公崇光聞而招之道光二十有九年公隻身詣左江鎮受撫檄剿土匪顏品瑤潘七李大樹青等事平還報勞公奇賞之令執斬門下為改今名字之曰殿臣示期望意洪秀金反公始屬向公榮部下檄率二百人破賊數萬於新甯捷上授守備賞戴花翎咸豐二年三月從剿湖南敗賊於道州蛇皮嶺克永安州追賊自湖南至湖北破洪山寺賊壘升都司賞給霍羅琦巴圖魯勇號無何賊陷武昌眾數十萬蔽江東下不旬連陷九江安慶太平江甯大軍由陸路追之抵九江賊去城空湖口無船不得渡留十有五日始渡比至江甯而城先十日陷矣進攻之軍鍾山久之復江浦游升福建漳州鎮總兵六年夏五月蘇撫吉勇烈公敗於鎮江死之未幾而有向軍鍾山之潰諸將震恐公從容指麾始得全師退次丹陽尋復進向公奏以公總統南北諸軍旋解金壇圍奉旨幫辦軍務奏勝復句容賞穿黃馬褂復鎮江與騎都尉世職擢湖南提督復桂林關賞換雙眼花翎調江南提督復揚州儀徵晉三等輕車都尉復九洲晉二等公受知向公倚如左右手大營先後奏捷數十皆公功也江南北數百里有警輒單軍馳援無虛月所至輒大捷迭荷先帝

褒旨。賜上方珍異。嘗傷於指。賜御用藥散。尤異數。既向公卒。某帥驕愎不省事。又忌公。事事齟齬之。公度不得行其志。誓以身殉。挾一指寄家。示無還期。公築長圍困賊。期年而成。攻益力。城垂破。各路援賊四至。某帥方以不破城不發餉激軍。軍屢譁。不為動。公跪諫。繼以泣。不聽。檄調副帥某回營。七往返。總督留自衛。不遣。公尋以追賊至鎮江。賊突出犯大營。某帥遁。軍大潰。公聞變。馳至丹陽東。遇賊大戰。傷重下馬。向闕再拜曰。臣力竭矣。復進望賊營而馳。渡河人馬俱沒。時十年閏三月晦也。公從軍十年。與士卒同甘苦。士卒愛而畏之。大營饑絀而譁。至矛傷向公臂。萬眾洶洶。公聞率小隊馳至。乃散。公令曰。罪人吾知之。諸營盡今日縛以來。則已。不者。張某且殲其營。日晡。得三十餘人。殺之。卒無事。軍令嚴。所過秋毫無害。身經數百戰。未嘗敗。北賊畏之如虎。既薨。鎮江營多公舊部。賊至。假公旗以出。賊披靡。陰雨中。賊輒望見公旗。故賊猶傳公不死神矣哉。公戰陣出新意。善察地勢。動合古兵法。向公以六合新勇隸公。公試之曰。若未能戰也。雖然。宜令若立功。將戰。公匹馬環視數十里中。得一僻地。令營之曰。旦日賊零星過若營。若出盡殺之。已而果然。故人人自奮。願從公。其援六合也。相賊船所泊岸數里外。令土人曰。若為我築土牆。自某至某。內外各一。外長二里許。內倍之。而斷其中。牆成以告。吾為若殲此賊。及戰。賊大敗。奔所泊岸。

皆循內牆左右走出。牆斷處見外牆。則大驚。亂追騎及之。無一逸者。九狀洲之役。公作背水陣。四眼狗率眾數十萬。迫我軍於江滸。公徙舟去岸。令曰。私渡江者斬。賊連踣我營數十。周提督天培歿於陣。眾頗懼。公手刃一人以徇。曰。今日進則生。退則死耳。麾眾而前。無不一當百。賊大敗走。遂復九狀洲。其布置多此類。又善以少擊眾。其復太平也。以五百人從。至則賊酋觀劇城外。公突至。大呼殺賊。賊奔入城。公麾兵隨之而入。城遂復。往返七日耳。軍中歌曰。張國樑走馬取太平。其援鎮江也。比至而賊退。將歸金陵。吉勇烈餞之九華山。酒中報賊至。出擊不利。公飲啖自如。呼其屬曰。賊近以告。俄而四山鼓譟。槍礮若雷。公起更衣。曰。請從此別。出營門立而指揮。分兵作數隊。揚旗出。公潛由僻路下山抄賊背。急攻之。與勇烈夾擊。賊大敗。死者無算。公遂歸金陵。是役也。賊數萬。公卒僅數百云。公之過丹陽也。周走四城。召父老謂曰。此城無守法。若等速東去。我留待若。公植立城上。賊望見之不敢近。盡一日城空乃行。往歲蘇州設撫卹局。公書來云。貴局多一難民。即敝營少一死賊。公在軍殺賊以萬計。而仁心為質。有如此。公長身力舉千鈞。而狀貌如婦人。好女侍人以謙。尤重儒士。稱於我輩曰。晚生。公軍出溧水。縣令供帳南門。公率親軍百餘人至北門。時漏三下。叩門求宿。無應者。得一古寺小憩。公以下皆藉草卧。黎明。縣令倉皇至謝罪。公曰。吾愛

此寺僻。眠甚適。不及至南門耳。遂馳去。卒無芥蒂。其大度又如此。軍暇輒作虎字。大徑丈。中直墨半枯。屹如鐵柱。名書家所不及。廉俸盡以分士卒。不名一錢計至粵。一子陰清幼。四壁蕭然。勞公方督粵。厚賻之。始成禮。可敬也已。公薨。江南皆賊地。後數月始得公死事狀。以聞。先帝震悼。與優卹。贈太子太保。晉一等輕車都尉。祀昭忠。立祠蘇粵。賜諡忠武。上即位。特詔加祭一壇。舊史氏曰。癸丑春。賊陷金陵。長驅南下。有席卷江浙之勢矣。得遷延至八年之久者。公力也。公死逾月。而江南數十州縣忽諸。詔有曰。東南半壁。倚為長城。尚冀該提督不死。出為國家宣勞。又曰。若張國樑尚在。蘇常一帶。何至糜爛若此。然則丹陽河之溺。非公一人溺也。江浙億萬生靈胥溺焉。天乎不已酷乎。

馬中書傳

吾吳古多文學士。而羽林期門。欣飛之選。或代不一人。文武才尤罕。雖范文正胸有甲兵。而西事未盡愜於論者。越在有明。惟韓襄毅號知兵。餘無聞焉。今所見以經生知兵者。中書馬君一人而已。君諱釗。字逸林。號燕郊。世為江蘇長洲縣人。十世祖鏗。明贈太僕少卿。始自合塘里遷入城。崇禎間。有全永巡撫名光者。有政績。著兩粵海。

遊記彙刻荆脫逸史中。君之七世從祖也。曾祖元宰。祖成龍。父培。著有吳門徵信錄。母某宜人。生子三。君其長也。幼慧。四歲入塾。讀書倍常童。九歲識星象。年二十有二。始入泮。問經於同縣陳徵君。為高足弟子。壽陽相國祁公來視學。奇君文。面試之。詢所用書出處。講論經義。移時遂食餽。大興李侍郎嘉瑞視閩學。聘校試卷。適年航海歸。入闈。以孟藝用。訓詁為主。司所賞。登甲辰秋榜。丁未。取宗學教習。出。今協揆。湘鄉曹公門。公夙重樸學。尤器君。厥後公督師東征。招君佐。封君以道速難之。遂辭焉。道光二十八年。江北災。饑民行乞入吳。次年吳中大水。君皆與賑卹之。役君究心水利。撫部沔陽陸公屬君視江陰。壽興沙。築圩資蓄洩。逾年工成。至今無水患。又監修東壩。尋陸公督兩江。行淮南。票法欲廉察商情。而無其路。謂君通達正直。遂憇恩君。運鹽揚州。君赴之。越二年。粵寇東下。公奏調君募勇。桐城濟師。行至樞陽。安慶陷。無何金陵陷。大城向忠武公代為督師。錢塘許公乃剗副之。君還至金陵。許公奏君留營。君以難民多死。倡議撫卹。公然之。全活無算。會自營歸。曰。川楚兵所帶餘丁。率健兒。而吾鄉空虛甚。盍捐資募為一軍。進可助剿。退可回援。余與程副憲庭桂。建其議。為請於許公。募千餘人。以崇縣劉刑部存厚領之。號曰撫勇。甫集。而粵匪劉麗川反。嘉定匪周立春繼之。不數日。連陷上海。青浦等六縣。勢張甚。向公令君與刑部卷甲。

趨之至青浦。夜漏三下。銜枚薄城。遲明克之。越十餘日。後隊始至。叙功得內閣中書。是役也。脫無刑部一軍。賊蔓延且不可問。君有功桑梓甚大。而曲突徙薪。知其事者絕少。適年復上海。君駐滬支應。與之終始。而不再叙。八年夏。許公復招赴金陵營。十年春。浙江告急。君偕總兵湖南熊公天喜赴援。復四安鎮。廣德州。奉調馳回。遇賊丹陽。戰於寶塔灣。中彈死焉。時三月二十九日也。年四十有八。事聞。賜卹如功令。娶某氏。某女。子文藻。國子監典籍。銜家居。後君一月殉難。君性孝友。接平人以謙。遇達官貴人。往往以氣凌之。故人或以為狂。膽氣絕人。單舸浮江海。若丙夜孤行。盜賊數憊。憫然無所畏。喜談兵。金陵陷。上書大帥。造戰船。橫絕江流上下。斷賊首尾。綜列條目。凡數千言。不能用。君於武事。頗主直儕輩。高自標置。難於向忠武。張忠武亦多所不滿。卒皆如其言。博覽群籍。先嘗為時人之術。三年。演弧三角三邊求角一術。心動得怔忡疾。顧性所喜。不能廢也。治經尤深。手輯經義叢鈔三十卷。於一切經音義法苑珠林。並有校本。細入毫芒。多所心得。皆於軍幕失之。惟集韻校勘記若干卷。以友人錄副得存。仲弟銘乞陳徵君為之序。俟事平而刊之。

舊史氏曰。君少時朝野歡娛。江表無事。獨喜閱兵書。儼然懷積薪厝火之憂。人或哂之。無何軍興。而君以知兵名。稍稍聞於諸將帥。故多訪君者。君亦未嘗不與委蛇。俯

仰先後十年。不得售一策。統一旅。徒以身殉之。何耶。論者謂君耿介剛傲。直道不容。致然。顧曹公幕府。以能得人重海內。所薦達文武士。致大官者。以數十計。君早出曹門。能容君必矣。乃歷游諸公間。而獨辭其招。又何耶。太史公於李將軍傳曰。數奇。曰。不遇時。曰。相不當。候。一篇中三致意焉。有以夫。有以夫。

張繼庚傳

張繼庚。字星垣。江甯人。父介福。道光丙戌科進士。湖南保靖縣知縣。繼庚有文武才。游庠食餼。家貧。幕游湖南。咸豐二年秋。粵賊圍長沙。巡撫潘忠毅公鐸城守。為君同鄉。知君才。使延君。君慨然許諾。縋城入。佐守禦。謀及圍解。度賊且東。犯急。歸省母。祁方伯宿藻聘。襄保衛。籌防兩局事。無何。江甯陷。託其母及方伯眷屬於友。先出城。君陷城中。賊脅入偽北典與衛。變姓名為葉芝發。君故善言語。佯與賊昵。因盡知大小賊目姓名。頗得賊中要領。久之。結賊為內應。賊多願從者。時欽差向忠武公榮駐兵城外。君令同謀金和。李鈞祥。何師孟三人。先出言於向公。公未之信也。書先後七上。向公亦訪知君為人。始許之。以入告。冬十有一月二日。潛出謁向公。言賊事。繼以慟哭。向公留宿定約。會大雨雪。不果。君志不少衰。復往來為期日。四年春二月十三日。同謀賊目張沛澤中悔。執君自首於偽東王楊秀成。秀成囚之。不殺也。而同謀之

賈鍾麟與城外金和等。仍密訂大兵於二十四日。由神策門進。先引田玉梅及官兵三十餘人入伏城中。約三更殺城上下賊。啟門事頗洩。是夕賊令門內加堅柵重鎗。玉梅等刃柵有聲。城堞賊驚起大譁。乃急登城。手刃數賊。賊吹角。群賊屬至。玉梅等遁。城逸官兵亦退。次日賊大索無蹤。乃出君窮治黨與。榜笞刺截。身無完膚。終無所言。最後偽官中有曾任知府某者。甘言解君。君曰。此何等事。江南人脆弱。若之所知。誰肯為之。我同謀皆粵中老兄弟。忠義人也。我國一死累之何為。賊喜。益誘君使言。且以偽官冊示之。君乃指其悍者三十餘人。皆立斬之。既而悟。乃起礮。君上向公書及賊獄所作詩未佚。又作絕命詞。有云。拔不去眼中鐵。嘔不盡心頭血。吁嗟窮途窮。空抱烈士烈。殺賊苦無權。罵賊猶有舌。江甯人傳誦之。君無子。以從子承豫嗣。同治四年得卹於朝。

舊史氏曰。江甯多奇士。曩余主惜陰講席。院生有蔡比部琳者。計偕至京。驟聞甯城險不試歸。則母陷城中。遂作乞兒裝入城。凡五閱月。輾轉得其母。負之而出。有當塗馬明經壽齡上元孫茂才文川失其父。亦如之。又有夏茂才宗銑者。賊脅就試。終卷罵賊語。賊寸磔之。即君同謀之金茂才和。亦惜陰生也。至如君尤奇之奇者矣。

陳君傳

陳君諱瑒字子璫江甯人祖國楨父昌緒仍世名諸生家小康藏書甚富母邵孺人生母汪孺人君有異秉讀書數過終身不忘能會通而貫串之經學史學小學天文輿地詩古文詞旁及詞曲武備方術靡所不習而尤精於算學惟不工制藝試帖楷書屢躓大小試年二十有七始受知於廖公鴻荃入江甯學咸豐十年粵賊東下金陵戒嚴君故能為陶宏景圖光術不輕試試輒有驗知城不可守亟出城葬其親既封而城陷配張孺人君兄庠生大紳及其子寶熙等五人皆自焚死先數日制軍陸公建瀛聞君名檄辦團練君已出城至是復有言於大城向公榮者檄君往君固有殺賊志遂應之向公令募一軍軍寒昭山當賊衝屢有斬獲或告向公君書生不任兵事向公素不喜文士意頗怠君乃辭去渡江僑居滁州涇陽張侍郎希城袁副憲甲三爭欲致君君鑒於前事皆辭之無何賊犯滁州乃挈家來吳門余之主惜陰書舍也院生以七十人為額若君與龔生丙孫皆不在額中輒作他人卷應課亦無定名而有作輒前列余既招龔生館余家龔生亟稱君所學勝之十倍余為延繪蘇州地圖因得益知君所學之廣且深信龔生言不謬君以文字之知執弟子禮惟恭余不敢承而意甚誠要必受其刺乃已蘇城既陷余避地衡山君與覺阿禪師相卿左司馬仁皆居山中晨夕相見司馬以覺阿言延君課其孫至館之次日生徒不出

詢之。則曰：屋窄欲罷讀。君翩然去。致束修不受。余與覺阿偵之。則炊烟斷矣。相與使
之。僅得不餓。先是偶與君縱論西人代微積拾級一書。初譯奧澀不可讀。遂與君商
權凡例。各日課二三條。聞警而輟。至是復續之。四閱月。成其半。而賊蹤益逼。余挈家
赴上海。君留衡山。獨為之。其明年。君亦來滬。則全書成矣。名之曰西算新法直解。君
既至。左司馬前卒。其子樞知前事。卑禮往謝。因復聘君。坦然赴之。合肥肅毅伯李公
耳君名。余亦為之介紹。湯果使雲松。又故賓主也。君皆不一謁。一日。余與劉方伯鄒
膏言及君。方伯曰：吾舊識也。在此耶。余以告。汜不住。其風節如此。余為薦入廣方言
館。課算學。與君同鄉姚拔貢必成同館。姚病利驟卒。君猶為屏當其喪。有頃亦利。是
夕時加亥逝矣。時同治二年秋七月二十有二日也。年五十有八。配張氏。先殉難。子
二。鴻鈞。鴻峻。視含殮。其明春。奉喪歸葬。越二年。鴻鈞游岸。君罵於行。道崎嶇患難。輿
殯不繼。女弟及甥葉庭瑤相依不去。生平無疾言遽色。犯而不校。與人交貴賤平等。
無纖毫之別。粥粥若無能。隨事叩之。殆無一物不知。廉而不矜。和無益峻。有以非義
干者。必拒之。雖饑寒不顧。生平著述甚多。皆燬。余所知者。算學發明二十四卷。算學
一得十六卷。亦未及見。存於家者。礮規圖說一首。鴻鈞已付刊。此外惟與余同著之
西算新法直解存。他日當付梓。難中何心著書。而君所學。轉藉是存百一可異也夫。

舊史氏曰。余生平所經萬里。所閱萬輩。所遇一材一藝之士。無不形於詞色。未見有不自表襮如陳君者。然以君之學而久不甚著。未始非不自表襮之故。可慨也。至其敦品勵行。尤非等儕所及。元和陳戶部俾與聚處。半載數為吾吳無此人。祇就其文學而言耳。合德行觀之。殆今世聖賢之徒矣。

葉節婦家傳

節婦姓葉氏。諱淑貞。字儷琴。既寡。更名利貞。字鐵琴。江蘇吳縣人。世居洞庭莫釐峰下。宋石林先生三十三世孫女。鹽運司運同銜承銑之次女也。母劉淑人。節婦生而淑順。六歲母疾。竟日不去側。九歲濡筆。寫生輒肖。運同君奇之。延鶴湖老畫師高元眉於家。授以畫理。數年超詣逾其師。丈許巨幅。作墨荷三四莖。蒼勁奇偉。見者不能測為十數齡女子所作。顧或亦以是知其非福。乞畫者日眾。乃為之例。一簞易米券三斗。歲暮積數十石。饋貧以為常。年十有七。歸同里候選同知周世璠。生一女。殤。越三年。世璠卒。遺腹生女。又殤。以夫從兄世瀚之子候選同知德槃為後。年纔九歲。家故相亞。父母愛之不忍遺。數日一至而已。節婦子身持家。養翁姑。從此長齋繡佛矣。又八年。翁卒。姑性嚴厲。聞於族黨。節婦百計委曲承順。卒相安無事。族黨益賢節婦。顧夙有肝疾。時時悶作。日以繪事消遣。夜輒吞聲泣淚。痕漬枕上。聞者憐之。能詩不

多作有題梅花句云。品節實從冰雪鍊。分芳不與李桃爭。他作稱是不存稿。惟畫稿四巨冊存。節婦家富甲山中。會軍興。官中需餉亟。節婦謀之。運同君曰。世事如此。家事如此。多積財何為。願助餉十萬。報二百年食毛踐土之恩於萬一。建義莊五萬。贍族之貧者。餘不下十萬。與嗣子某若得行。亦今世席太僕矣。何如。運同君以為然。力憊患之。席太僕者。明末山中素封。毀家輸餉。衛鄉里。得太僕卿銜。里人至今傳誦。故云。節婦遂以其間請諸姑。不應。無何賊至。質庫若而所。蕩焉泯焉。姑婦轉徙湖濱。賣衣飾易米者兩年。舊疾益亟。運同君聞之。逆之歸。調攝未月。一夕晨。棄呼母曰。天曉未。今日大冷。兒篋有厚絮衣。母可取衣之。無何遂瞑。猶手臂書一帙云。節婦以道光九年九月二日生。以同治元年十月二十四日卒。年三十有四。守節凡十有四年。運同君哭之慟。且請旌於朝。節婦為余家婦之女。兄運同君故屬余傳之如右。舊史氏曰。節婦女弟。又有適天津金剛慈公子厚增者。寓吳中。庚申之難。避居郊西之跨塘。賊突至。罵賊不屈死。姊妹節烈。其感可敬也。顧忠義激發。臨刃如飴。須臾間事耳。節婦處萬不堪之境。歷十數年之久。辛苦艱難。卒歸一死。則節婦之所處。有倍難者矣。能詩工畫。非女子之福。信矣哉。

華爾美利堅高要人。初仕本國為將。以罪廢。來上海。國人欲殺之。會賊陷蘇州。上海將治兵。候補道楊君坊愛其勇。匿之家。介上海道吳君煦言於美領事。獲免。以是德吳君。願效死。咸豐十年夏五月。賊陷松江。吳君令華爾募西勇數十人為前行。我數百人半夷服。半常裝。繼之。華爾誠曰。有進無止。止者斬。賊迎戰。槍礮雨下。令皆伏。無一傷者。頃之突起。手加額為號。百二十槍齊發。凡三發。斃賊數百。追之。遂與賊偕入城。置一棹中。僑登之。黃衣賊五輩乘馬來接戰。斃其四。最後傷其一。賊呼曰。走城。遂復。初吳君與華爾約克城。盡賊所有界之。比華爾至。賊館空矣。蓋我勇入城。觀華爾方酣戰。先搜之。吳君更與華爾五十金。西勇不與。多怒跳去。或轉從賊。華爾移師青浦。如前法。華爾登城。槍中其股。墜復登。回視我勇已退。乃還。華爾既病創。西勇亦遣去。久之。松江再陷。再復。華爾病瘵。吳君乃令守松江。練洋槍勇五百名。衣服器械。步伐皆夷也。同治元年正月。賊犯松江。廣富林眾數萬。華爾率五百人禦之。賊圍之。數十重。華爾乃分其眾為數圓陣。陣分五重。人四嚮。最內者平立。其外遞俯。至最外者幾踞地矣。皆以槍外指。望之者如饒首刺以針然。將居中。吹角為號。一動無不動。數十槍齊舉。始徐行。漸疾行。所至賊披靡。圍自解。且爭退去。華爾乃撤陣起追之。至辰山。飛彈斷一指。不為止。賊大敗。遂平辰山。及天馬山賊營。事聞。賞四品翎頂。命

其軍曰常勝。是時賊自浙東聯絡金山蕭塘南橋以達於浦東之高橋。皆有悍賊守之。會西人願助順。新設會防局。於是華爾會英提督何伯法提督卜羅德攻之高橋。平。是役也。賊凡三萬。華爾與英法三軍各五百人。卜羅德死之。二月朔。進平蕭塘。詔以副將補用。夏四月。復合西兵克嘉定青浦。五月。克浙江之甯波。以常勝軍四百人守之。華爾往來策應。以為常。賊之圍松江也。調甯波軍回援。大敗賊於豆腐浜。圍乃解。嘉定既復。賊復圍之。洎西兵至。則突圍入城。挾中西守兵偕走。城復陷。青浦亦如之。至是。巡撫李公鴻章議復青浦。七月。檄程學啟由北潯山進兵。而令華爾薄南城。並駛小輪船逼城濠。以大礮裂城。麾軍冒烟上。遂克之。先是華爾所分兵守甯波者。進克餘姚。賊至。益眾告亟。復令華爾馳援。未至。賊再陷慈谿。翌日。華爾至。立復慈谿。登城時。中槍。乃洞胃。達背而出。乃歸甯波治創。八月。戊寅卒。李公令以中國服葬松江。詔立祠祀之。喪歸。吳君檢其篋。得金陵城圖。凡賊酋所居百十處。距城垣丈尺方位。纖悉皆具。亦不知何時何人所繪。可謂有心人也。

舊史氏曰。余在李公幕府。見常勝軍支應之籍。西將薪水月百金以上者。百數十人。視他軍數倍。口糧軍械稱是。主者吳君煦立意以為我將。我勇。率無賴。城旦暮不保。而府庫充實。與其泰無賴。終且貽賊。不如與此軍。一時權宜。不為無見。始僅五百人。

後增至四五千人。功不細。費亦不貲。李公從容指揮。次第減撤。中外無一言。蓋於此幾費紆籌矣。先後置將四。白齊文背畔。不必論。與倫之聞。兗戈登之騎塞。不能不以華爾為最。余嘗見其練兵。居中吹角。有聲。卒皆魚貫至。又有陳或左或右。或橫或縱。或直或斜。或八字。或十字。或環或圭。或塊或鉤。或梅花。或蝴蝶。隨角聲而變。其行也。雁行進。舉足如一。兩跨間射以矢。十發十穿。無所滯。斯尤長技。蓋泰西舊法如是。頗得古人不憊步伐之意焉。

龔生傳

余之主講江甯惜陰書舍也。見某生卷楊嗣昌論云。有公罪十有八。有私罪七。據本傳者十之三。會通穿穴他紀傳者十之七。大奇之。謂真能讀書人。既訖。非某作。龔生丙孫代為之。於是始知有生名。越九年。余家居。生業師馬生鶴船具言。生被難來吳。狀余為致之家。凡三年而卒。生字子章。號祖望。上元人。先世回回籍。父元藻。諸生。嗜古多藏異書。君幼慧。偏讀之。善鈎稽。同異。下筆斬斬。有辟易千夫氣概。見賞於涇陽張侍郎希。以第一人游庠。咸豐三年生。兄弟先後病死。賊陷城。生逸出。失其父。乃為乞兒裝。朝暮過賊營。習識數裨卒。轉輾物色得之。竊負而逃。家有湖墅田三十畝。傭者甚忠謹。迎生父子居之。六年。父卒。無何。向營潰。賊蹂躪數十里。生一妻一子至吳。

余有田舍數椽。在郊西鄧尉山下。藏書存焉。延生挈家往居之。兼主鎮之一仁堂。計簿出入不苟。以其間校說文韻譜。頗樂之。善病。三年中瀕死者再。卒年三十有三。時八年十月二十一日也。葬蘇城外回回墳。妻某氏。某來將女子若干人。皆幼。臨賊其長者得贖歸。顧不肖。年十有一。輒私取父母物鬻之市。以易肉餌。甚且學吸雅片。生既卒。余在京師。同事不敢留。隨母入清節堂。尋逃去。凍餒死道上矣。生清臞鶴立。曾而癡結喉露。意氣軒然。不可一世。博覽經史。為詩文如其人。時文不屑作。間作亦岸異。取科第有餘。耿介兀傲。經難彌厲。人以為狂。余獨以為狷。生之甫出也。撫邵錢塘許公。乃釗為食於路。別諸生之館。試以詩文。奇生作。延入幕。他日屬以檄。公疵焉。生拂然起。跡之逸矣。潘公子曾瑋介余乞誄母。久不應。謂人曰。公子不投一刺。豈可為作誄乎。余亦不敢強也。余作某銘。屬生錄寄。且曰。可節者節之。生具言數處存十之三耳。余無以難之。呼余子曰世叔。顧評斥詩文不少假。寓鄧尉。自署聯曰。日課惟楚金韻譜。石交有天監經幢。其風節有如此者。著作甚夥。皆佚。校韻譜未竟。他日付刊。當備采其說。以存吉光之羽。余所見文人之厄。殆至生而極。馬生為之傳。頗略。故以所知補之。噫。斯人可多得哉。

功甫潘先生暨配嚴宜人合葬墓志銘

士博一科一第。館一職。朝不坐。燕不興。手不操尺寸之柄。雖有康濟天下之願。無所於施。則退而為善於一鄉。所持既甚約。所被又不遠。而居然行其法。足以澤一時。存其書。足以利天下後世。可不謂賢乎。如吾鄉功甫潘先生是已。先生諱曹沂。初名遵沂。功甫其字。嘗夢前身為浮渡山僧。自號小浮山人。太傅武英殿大學士文恭公冢子。籍系官閥。詳余所為文恭公墓志。年二十有一。舉茂才。二十有五。登賢書。尋以例得內閣中書。道光元年入直。四年假歸。遂不出。久之以災賑議。叙光祿寺署正衛先生孝友仁慈。出於天性。生八日而母謝夫人卒。終身以為隱痛。事文恭公暨繼母汪夫人。得其惟心。居葦下三載。交海內諸名公。以文章道義相切劘。要路雖父執不一謁。一日入朝與友俱。一達官出。友趨而與之言。既去。問何人。友駭曰。英中堂。不識耶。英國文恭公同年。時為樞相。云。嘗例謁於閣師松筠公。會軍機需人行。選而試之。公素與文恭公善。因問曰。考軍機乎。先生愕然曰。未也。公深悔失言。與人交。貴游寒畯如一。僮僕亦化之一。矯矯謫之俗。厥後家居。值文恭公當國。彌自韜匿。就所居鳳池園。構一椽曰船庵。鍵閣謝人事。焚香讀書。澆花洗竹。一家如在深山中。一童子應門。客至。受東門隙。無貴賤。一不報。中間省侍京邸者再。往返數千里。亦不見一客。俗所用署名小紅箋。擯不具者二十餘年。中歲以後。長齋禮佛。究心內典。嘗曰。二教功

夫總自腳踏實地做起。又作放生會曰。天人感應之理。惟此最顯最速。大用莫如仁。當於此處著意。使其長養而擴充之。生平為善。如日用飲食之不能輟。罄其田二十有五頃。建豐豫莊。備平糶諸用。歲小歉。輒弛佃租。先後十餘年間。蠲米凡四五萬石。里中水旱舉賑。留養他郡流民。以若施衣食。饋醫藥。建義塾。育棄嬰。諸善舉。吾吳故多好善者。類能為此。不足為先生紀。顧自先生倡之。則一郡應如響。率欣然。策錢粟踵至。以是事易集而效彌廣。修大佛支七世宗譜。謀於族。立松麟義莊。族屬之貧者有常餼。區田法見賈思勰齊民要術。王禎農書。先生謂田之賤。土之瘠。收之薄。賦之重。莫甚於吾吳。惟區田法行而後穀可多。田可貴。作課耕會。試行於封婁之郊。果倍獲。遂著豐豫莊本書。列直講三十二條。以貽農人。濬興福塘。河十有二里。曰堯峰河。旁近資灌溉之利。著蘇松減賦說。又謂宜亟行於減賦之先者。曰農田。曰水利。先於近水諸郡。督種稻田。一二年後。成效眾著。乃上聞。推其法於西北。漸令水利日興。稻田益廣。則西北之米自足。而東南之賦可減。可謂探本之論。喜游名山水。嘗北登太山。觀日出。自武林而西。歷徑山七峰兩天目。東逕海昌。陟大興山觀潮。又過錢塘。至桐廬釣臺。折而東。渡曹娥江。躡天台。步石梁。觀瀑布。又嘗沂大江。上匡廬。游潯陽。庾樓琵琶亭。黃州赤壁。漢陽黃鶴樓。浮洞庭。達岳州。徧覽岳陽樓君山諸勝。遂訪銅

陵浮渡山。尋前身涅槃處。迤北越清流關。由臨淮以歸。所至蕭然行李。晦名姓。獨故人林文忠公方帥兩楚。偵知之。屏牖從。訪於舟次。留之不可。賦詩唱和而別。為一時佳話。先生不為術數之學。而自言夢輒驗。仿東坡夢齋作正續三十六夢龜圖。弟少宰公曾瑩之舉京兆。從子侍讀君祖蔭之提南宮。咸預知。次第不爽。壬子春。趣工治義井。鑿新溝。傷凡四五十區人莫測也。無何秋八月不雨。至冬十有一月。城中擔水直百錢。遠近賴以得飲。始大異之。殆佛家所謂習虛靜而成通照耶。抑吾儒所謂至誠之道。可以前知耶。詩文澹遠名雋。自成一家。中多憂時感事之言。尤惓惓於東南賦重財竭。農田水利之不講。民生之日蹙。思有以挽回而補救之。幾於舉筆不忘。蓋先生學問經濟之大者。實在於是。稱之者曰高隱。曰好佛。曰詩人。皆目論也。嘗自言一生大略。盡於數卷詩中。所著詩集三十二卷。刊行者大半。東津館文集三卷。船庵詞一卷。豐稼莊本書一卷。小浮山夢志一卷。護生庵集一卷。藏於家。先生貌腴而體羸。晚得肺疾。咸豐二年冬。疾大作。聞粵警。力疾寓書楊中丞文定於江甯。言防堵事甚悉。於是先生不與當事通書者十餘年。而亦遂以此絕筆矣。臨歿。為儀鳳舉。溫良恭儉讓君子。懷刑出門。如見大賓。數語。且曰。吾念汝祖父神明湛然。時十二月二十日也。春秋六十有一。其明年八月。葬吳縣二下五都一園。維字圩茭白蕩和祥濱之。

原配嚴宜人。歲貢生選之曹孫女。乙未會元。上書房翰林福之孫女。乙卯翰林杭州府知府榮之女。年十有九于歸。逮事重闈。以孝稱。先生自閉戶而後。散遣奴婢。躬操作汲爨。有寒素所不能堪者。宜人怡然安之。即貧過人可知。咸豐五年七月朔卒。年六十有四。側室楊宜人。子二。庭誥。錫儀。鳳正。一品廕生。先生卒。實承文恭公之重。女三。壻韓文和。甲午舉人。山東揀發知州。汪庭樞。銅山縣訓導。將銘經。吳庠生。孫女二。比者僕鳳來告曰。先大夫之葬。以時之多難。相地負土之遽也。未遑治幽宮之版。無祿先宜人繼逝。將以十一月十八日合祔先塋。願如唐以後合葬墓志之例。以補其闕。是有賴於子。余何足以知先生而三復遺書。竊有嚮往之願焉。不敢以不文辭。銘曰。

渺然寸抱。兮萬族惻然。蕭然斗室。兮四野吟呻。嗟嗟乎先生。天生斯人。宜金紫是紉。宜期頤是路。曠義滂仁。大濟時之艱。胡為乎三載掖垣。五試春官。忽翩乎其絕塵。晦迹平泉。飯心竺乾。靈養不寫。水冽不瀾。不位不年。以昌其文。以焯其傳。以蔭其後昆。嗟嗟乎先生。斯藏孔安。我銘不刊。永永千春。視此貞珉。

遊西山記

許宗衡

余昔於咸豐壬子秋八月。與同人遊翠微山。三日而還。當為詩紀其勝。又十年。同治壬戌。又八月。同人復往遊。而先悉戒壇潭柘諸寺。七日而還。同人皆有詩。余亦繼作。自來京朝官。非六部曹司。與值軍機。入內閣者。皆蕭散。余與張君午橋。既職業清暇。而午橋弟叔美。姚君仲海。潘君清畏。又以未仕。可供幽討。凡遊之境。詩皆狀之。無可記。雖然。幽寂之事。志窺利者鄙夷之。非憤激於時。思以適於廣漠者。一抒其所積。則必麋鹿之性。見山林而喜。雖日居塵囂。紛擾之中。不得以曠朗者縱逸其心志。斯亦抑鬱而不怏。然則莊生所云。山林皋壤。使我欣欣然而樂者。於二者必居一焉。其必非無感於時。與故拂其性者之所為也。夫時之不能無感。而性之不可少拂。皆今之所謂不達者也。未知諸君何如。記之。且以誌余悔焉。

復黃生瑾甫書

瑾甫足下。六月六日。得正月書。甚慰甚慰。僕狀無可述。可述者舊疾大愈。能眠能食。能讀書。能為文。能坐忘不出門。見富貴利達。能不欲。如是而已。雖然。未聞道也。忠孝節廉。人生不過數大事。僕鮮民矣。孝不孝何忍言。枝官耳。忠無由見。閉門絃誦。與世無涉。又何從知節廉。然夙夜恐懼。不敢失此心。雖不能不敢不能也。當試綜生平。

而計之能安貧能循分其大較也。關關濂洛僕不能也能不賊性毛戴鄭孔僕不能也能不臆說班馬韓歐僕不能也能不徇俗董之不言功利僕不能也能不近乎名賈之洞達事理僕不能也能不惑於眾循循常常人以為狂僕不恤也曰惟守此數大端而已足下從僕遊者也僕所能足下能之耶。觀致荀叔書足下能安貧矣是即僕所能者也。然僕之能有守而已足下其進而有為乎。有為者亦若是立身行己修行砥名無憾於倫常無愧於德業勲業蓋宇宙文章耀今古未有不一一自澹泊起者澹泊者何。惟此數大端其他皆飄風浮溫不獨富貴利達也功利之見亦必舉而空之非謂敝衣惡食如蓬戶之氓委巷之士與夫鄙夫吝嗇之所為也。古者大夫而豚肩不掩豆矣宰相而布被脫粟矣賢不肖豈繫乎此必以原憲之緼袍賢於季孫之狐貉子思之銀珮美於虞公之垂棘賢不肖又豈恃此乎。足下書言瓶無一夕之糧衣惟百結之絮處之澹然僕故以足下為能安貧然猶有貧之見也僕昔貧甚於此僕能安之亦不能忘之戴記曰君子已能亦樂人之能也已雖不能亦不以援人僕既樂足下能僕之所能尤願足下能僕之所不能也夫不可知者命也君子不謂命貧亦適然之事耳富貴利達亦適然耳要其權操之自人忠孝節廉則操之於己能忠則忠能孝則孝能節廉則節廉吾勉焉雖懦夫皆貴育也欲富貴能富貴乎。

欲利達能利達乎。於是奔走伺候。黃緣攀附。脅肩諂笑。回面屈節。有富貴利達者。亦適然耳。不如是。即不富貴利達乎。求則得之。宜若可為。然而鳴墮腐鼠。非虞氏之壘。鈎冰沃地。非姑射之機。事出慮外。非其罪也。而俠客大怒。虞氏見滅。邾君亦大怒。而姑射獲免。莊姜適衛。美而無寵。宿瘤適齊。醜乃蒙幸。遇不遇命也。誠適然也。而可求乎。求即得之。僕亦不能也。嗟乎。老聃至西戎。而狹言。夏禹入鯀國。而解裳。與世推移。隨俗浮沈之言。豈足信哉。僕之不能。非僅為此。以有所能者在也。是故君子責務本。本者何。即此數大端。出此則入彼。入彼則出此。世之能此者。不能彼。能彼者。不能此。吾與之共遊。而可不擇哉。楊子之泣歧路也。墨子之悲素絲也。蓬生麻中。不扶自直。白沙在泥。與之皆黑。幾至危也。效至速也。今夫山始於一撮耳。然五嶽基於此。今夫水始於一勺耳。然四海源於此。此數大端者。口熟之。則易如山之一撮水之一勺也。身體之。則難如山之五嶽水之四海也。吾不以易而忽。吾不以難而阻。則一撮即五嶽。一勺即四海也。或以為易。則一撮無基。而一勺無源。或以為難。則一撮非山。而一勺且非海。而又助之以虎狼焉。而山終無可登。益之以蛟龍焉。而水終無可涉。雖貴育猶懦夫也。尚何能哉。尚何能哉。足下能僕之所能。亦惟務本耳。其原在澹泊。惟澹泊故能有守。惟有守斯能有為。若所謂富貴利達者。山之虎狼也。水之蛟龍也。不能

生我能死我者也。日日在我前。若歧路之可南可北也。如素絲之可黑可白也。達不生於麻而沙已在泥。則危之又危也。足下勉之哉。夫有可憑者。學也得。僕言而充之。由是而班馬韓歐馬。毛戴鄭孔馬。關關濂洛馬。馴致於賈之洞達事理。董之不言功利。則洵乎能有為者矣。足下勉之哉。中庸曰。君子素位而行。不願乎其外。孟子曰。人有不為也。而後可以有為。此物此志也。不見既十三年。中心拳拳。無一日忘。今乃發憤一道。然僕亦僅能言之耳。足下能行之乎。人各有能有不能。惟足下審端致力而已。不盡。

張石樵先生別傳

許宗衡曰。嗚呼。士生於世。讀書期有濟。不幸老牖下。雖有文章。世方以為空言。其孰從而惜之。而乘時得志。既有事權者。又多無濟於世。其藉口於艱難。而隱以飾其無識無才。則人轉歎其遭時不偶。無以表見於天下。古今人才之消長。與世推移。卒至湮沒於眾人之無知。蓋比比焉。悲夫。禍患之機。伏積於未見。深識者言之。不非笑。則迂怪。而不知士之洞觀於數十年之前者。固燭照數計。而世且漠然置之也。淮南鹽策甲海內。方乾嘉盛時。淮綱皆直達。東自泰州。西極於江漢。轉運半天下。歲額引百三十萬。鹽艘沿明制。至儀真。則改捆。其歸多載荆湖竹木。紙炭魚米百貨。市於儀儀。

之民倚為生活。無慮數萬家。不逞之徒。藉以弭其虎噬狼貪。而窮氓婦女。以箕帚拾其餘利者。又以補其凶荒水旱之不足。道光辛卯。制府陶文毅公議就各場捆掣。俾民慮無生法。人情洵懼。邑父老皆太息曰。如儀之民何。當是時。石樵張先生獨毅然曰。周禮閭民轉移執事。管子云。衣食足然後知禮義。此議行。豈獨儀之害哉。成法不可妄更。張見近利而貽遠患。必自此始。乃與父老上書文毅。復馳告鄉人。官京朝者。疏陳得失。事乃止。於是儀之民皆獲全。賴其利者幾二十年。人猶謂儀固有是利。特先生能保之事。苟不止。未見其害也。無何。改票販淮。綱卒散。沿江民多失業。及粵寇破武昌。由楚東下。鹽梟揭竿斬木。失業者響應。嗚呼。勾連蔓延。遍東南。創鉅痛深。其害果何由哉。然後知先生維持審畫於二十年之前。非空言也。猶憶戊申己酉間。宗衡居揚州。常與先生相過從。先生曰。讀書無所濟於世。雖百年猶虛生。嗟乎。事權之不屬。徒以讀書所得。不幸而言中。使遇於時。其所濟於世者更何如。乃世之遇而無所濟者。又復不少。然則空言非可信。空言而可信。獨先生為然。而先生卒老牖下。無由表見於天下。是固不獨先生之不幸也。先生名安葆。字石樵。晚號潛翁。性孝友。精歌詩。宗衡識先生時。先生年未六十。同治癸亥。以子丙炎官編修來京師。明年四月以疾卒。年七十。宗衡少壯轉徙江淮間。多交耆成人。與先生跡尤親。及先生來京。

師猶數誦先生讀書無濟百年虛生之言。先生喟然曰。老矣。且空言何足尚。足下勉之。然宗衡年二十餘。以公車踐齊魯。歷燕趙。中間奔走衣食。往來數千里。及乎寇亂起東南。亦嘗心識天下之故。性既磊落。又以枝官寂寞。其無濟於世。蓋亦先生所矜歎者。乃於先生歿後。用空言為別傳。以報先生。其慙負先生為何如。然宗衡亦五十餘矣。

記籬

籬。籬也。又蔽也。王者申畫屏藩之義。於是乎在。然非城郭垣墉之可恃。必善為護。必曲為防。余既種花與樹於庭。其西偏為庖廚。家之人所出入。以籬界之。毋混淆。又戒奴日守之。勿手撼而足踐。猶懼其疏也。鄰之犬時來。恐觸而壞。則呵叱去之。是奴之職也。以籬為可守。不以籬為可恃。則庶免鄰犬之觸乎。嗟乎。鄰之犬。其咆哮奔突。無如何者也。吾恃吾籬而已。不善守之。且自壞之。吾之庭。皆犬之迹矣。此何為哉。此何為哉。

蕭唐卿傳

貌短小。衣不蔽胫。而氣磅礴。日蹢躅街衢中。市人皆目曰。此蕭唐卿也。唐卿名人官行六。故人又呼為蕭六。云其先世以合肥人。僑寓金陵。宦於蜀。君幼自蜀歸。貧不能

謙性好方技。貧甚。則賣卜。言多中。然所得少。則怒曰。古言病者或以愈。死或以生。患或以免。事或以成。嫁子娶婦。或以養生。豈直數十百錢哉。利大而謝小。吾且不能飽。是所操者左也。去為醫。衣襪襍。又好神其言。病者詫謂先生得無誕乎。火其方。不敢藥。於是君益貧。嘗與邑人王章朱琦遊。故亦能詩。稍稍為應試文。性既強記。日獵古典。諷誦之。遂以試賦為諸童子冠。入為上元縣學生。然年已逾三十矣。初余頗貌君。然聞其言。獨怵然。居常好論議。聲洪若鐘。每大笑。冠纓索絕。觀者謂有淳于髡之風。故世又斥以為狂。年將四十。始有婦。遊於揚數年。境仍貧。然不至不飽。君歎曰。丈夫不能取富貴。僅而能飽。而老將至。日月逝矣。知我其誰。復取黃帝言。切脈望色。聽聲寫形。鉤扶幽隱。日求精其術。思所以活人。余嘗病喉。君為之輒愈。終以貧無信之者。粵賊陷金陵。君與妻皆自縊死。著有啞科三卷不傳。

許宗衡曰。相馬失之瘦。相士失之貧。非世之寡識乎。天下無日不需才。徒求之科名。閥閱之途。世之所以不治也。山林枯槁。閭里困阨。至於卑官下走。往往一飽無時。謂其中必無深識偉略。可以經盤錯。濟艱難。豈通論哉。演連庸悞。日坐取富貴。而懷才負氣之士。率窮餓以死。蓋又不獨於醫卜中失蕭生也。嗚呼。

遣四愁詩引

凌玉垣

平子四愁體無複擬。孟陽後作。竟乏神致。暇日思為地足。因倣其體。上希先聖各言爾志之意。近慕士衡襲故彌新之論。發情屬翰。謨言述古。題之曰遣四愁云。

張玉夫孝廉聲玠新樂府題詞八首小引

玉夫暇日為玉田春水軒雜曲若干首。貞雅倣詭。事不一致。類情揣稱。務極傑麗。清容先生之續也。為各題一截句其後。

比干論

周偉祥

論語記比干諫而死。孔子合微箕稱爲三仁。誠千古定論也。予以爲孔子仁比干之死。蓋以其諫不聽而自盡耳。非以其強諫而紂殺之也。自秦誓有剖賢人之心一語。竹書紀年則曰紂殺比干。家語則曰比干剖心。史記則曰比干伏象魏之門。三日強諫不出。紂怒而剖其心。蓋欲明商年之暴。表比干之忠。而不知道以不仁誣比干也。夫比干之諫。將冀其改乎。抑速之敗乎。比干。紂叔父也。徒強諫成君以殺叔父之名。使天地爲之震怒。鬼神爲之不歆。祖宗爲之寒心。國人爲之隕涕。而奸人且爲之伺釁。致異日毫社鼎遷。自貽伊戚。仁人固如是乎。且君臣父子。處常處變。其義一也。嘗考舜之事父。大杖則逃。小杖則受。孔孟稱之。謂欲之死而不死也。申生勇從。衛伋不諫。君子傷之。謂欲之死而竟死也。父雖欲之死而不可死。君不曹欲之死而顧可自蹈於死乎。箕子有言。爲人臣諫不聽而去。是彭君之惡而自說於民。吾不忍爲也。諫不聽而去。且不忍諫而使君慘殺其身。忍乎。嘗觀祖伊之諫紂也。曰非先王不相我後人。惟王淫戲用自絕。又曰民罔不欲喪。曰天曷不降威。逆耳犯顏。夫亦漢唐中主所不能容者。乃不聞剖祖伊之心。而獨剖比干之心。何哉。是必強諫不聽。號泣不已。從而指摘之。指摘不已。從而奮怒之。令紂萬難自容。然後憤激而剖其心。烏乎。比干

國朝文匯

卷十七

三

國學扶輪社印

而忍出此哉。子貢謂紂之不善。不如是之甚。吾故信其無殺叔父之舉。而知比干固因諫不聽而自盡也。然則比干曷為自盡哉。諫則不行。言則不聽。蜩螗沸羹如故。彊禦播克如故。聽斯民之詛說。親師保之顛隳。相對歡戲於邑無色。則惟抑鬱以終。或不致自親。故宮未泰耳。萬一王哀叔父之死。萌悔悟之幾。則雖死猶勝於生也。即不然而耿耿孤忠。或足致天命之少延。邀廟社之默鑒。一旦紂崩殂而武庚嗣興。召微子立太師。興復殷室。其又將旦暮遇之甯非出於至誠也哉。故曰仁也。程子謂不當愚者比干。蓋從泰誓家語史記及竹書紀年之言。毋亦未按孔子所以仁比干之死耳。而皇甫謐謂紂剖比干妻以視其胎。其明襲泰誓剖心之語。而附會剔孕之言。又無論矣。

嫦娥奔月說

王充論斷云。羿請不死藥於西王母。其妻嫦娥竊以奔月。是為蟾蜍。事之有無固不必辨。亦不必非也。袁郊詩曰。后羿偏尋無覓處。誰知天上亦容奸。是不知嫦娥并不知天也。天道福善禍淫。人必如軒轅乃能升天。如傳說乃能託精神於箕尾。苟非其人。雖服氣鍊形不能。唐李虛中餌金丹而疽發背亡。可驗也。從來奸人擅國。忠言伏賢人隱。惟婦之賢者可行其柔正。以諭之於道。羿篡臣也。嫦娥賢婦也。陳嬰之母知

陳氏之廢。王陵之母。知劉氏之興。嫦娥之賢。豈不知大禹明德。非一再傳而湮滅者。羿篡竊。非克保其首領者。想其周旋有窮。旁引曲喻。以隱奪其權。奸之魄。陰消其跋扈之心。不知若何周且至矣。奈羿暴疾性成。諫之不聽。不聽而強諫。適足以殺其軀。蓋彼既無君臣之義。亦何有夫婦之情。嫦娥既不能甘心為亂臣賊子婦。又不敢背與齊不改之義。則惟有死無二。適羿請不死藥藏於宮。乃服之以奔月云。夫玉母竟以藥賜羿。羿復藏而不遽食。蓋所以玉成乎嫦娥也。以為天上容奸悖矣。然則天下不知天不容奸。而為樂所誤者。亦可返矣。或曰。明皇何以游月宮。不知明皇倦於聲色。昏迷政治。冥其心以求天地閒元渺之事。一時術士迎其機。偽為月宮之游。厥後果以霓裳羽衣曲。引導貴妃。幾於喪國。豈月宮貽此淫聲。以禍人家國耶。

國朝文匯丙集目錄

卷十八

劉毓松

字伯山江蘇儀徵人道光二十年進士有通義堂集

兼祧之禮合乎古義說

汪士鐸

字梅村江蘇江甯人道光二十年舉人有梅村先生集

張楚寶君子居記

龍啟瑞

號輯五字翰臣廣西臨桂人道光二十一年進士授修撰官至江西布政使著有經德堂文集十四卷

春秋不稱天辨

宋伯姬論

陳平周勃論

粵西圖練略序

讀書參傳書後

書歐陽子縱囚論後

跋蘇明允集後

致馮展雲侍讀書

國朝文匯

卷十八

目錄

一

丙集

一
四
五
五
六
七
八
九
九
十

致曾將筆侍郎書

十

上梅伯言先生書

十一

答羅生書

十三

送呂介存南游序

十四

王拯原名錫振字定甫號少鶴廣西馬平人道光二十一年進士官至通政使著有壁山房文集

要礎課誦圖序

十五

王剛節公家傳跋尾

十五

嘉興錢先生家傳

十六

陳立字卓人江蘇句容人道光二十一年進士官至雲南曲靖府知府有句溪雜著白虎通疏證

跋胡農部河南余氏服議後

十八

胡焯字光伯湖南武陵人道光二十一年進士官至侍讀

武陵水災記

十九

方東樹字植之安徽桐城人增生著有儀衛軒文集十二卷

闡幽彙記序

二十

書法言後

二十一

張

穆

字石洲山西平定州人優貢生著有片齋居士文集八卷

與陳頌南書

二十二

管嗣復

字小異同之子諸生通算學能文早年同遊無後文附同集

書汪馬二秀才事

二十三

彭昱堯

字子穆廣西平南人舉人著有致翼堂文集

讀蔡仲之命

二十四

國朝文匯丙集卷十八

兼桃之禮合乎古義說

劉毓松

議禮之家名為聚訟。欲核其禮之得失者。必析其義之是非。新例獨子許其兼桃。或以小宗子兼桃大宗。或以小宗子兼桃小宗。其制似為古禮所無。而其義實為古書所有。然近時議禮者。每有異詞。或謂古人合族共一大宗。非各支立一大宗。抑知大宗之體統有定。而大宗之人數無定。故有謂大宗只有一人者。此杜預之說。有謂大宗不限人數者。此賀循之說。范宣曹述初皆與賀說相同。而不從杜說。今按禮記大傳云。別子為祖。繼別為宗。宗其繼別子者。百世不遷者也。鄭註云。諸侯之庶子。別為後世為始祖也。謂之別子者。公子不得稱先君。又若始來在此國者。後世亦以為祖也。王制云。大夫三廟。一昭一穆與太祖之廟而三。鄭注云。太祖別子始爵者也。雖非別子始爵者亦然。繹鄭君之意。士大夫之始來及始爵者。尚得為別子。則凡諸侯之公子。自嗣君以外。無論嫡庶長幼。皆得為別子。不獨始封之世子母弟。乃得為別子。足證大宗不限人數。而非止有一人矣。況乎大宗小宗之分。由於兩相對待。而所謂對待者。亦隨時變遷。故后稷不啻有別子。而公劉言君之宗之。則當以公劉為大宗。而郇幽之別子。皆為小宗。公魯公為宗國。而秦伯於宗室為長。則當以秦伯為大

宗而東魯之宗國仍為小宗。此大宗有時而稱小宗也。繼高祖之小宗對繼曾祖之小宗則為大。繼祖之小宗對繼禰之小宗則為大。此小宗有時而稱大宗也。然則有兼祧之禮以觀其會通。則古人所謂大宗者。今人固當實指為大宗。古人所謂小宗者。今人亦可借稱為大宗矣。或謂大宗不妨間代立後。何必獨子兼祧。抑知昭穆相當者。禮之常。而間代立後者。禮之變。故有謂大宗可間代立後者。此劉寶之說。有謂大宗不可間代立後者。此王敞之說。何琦與劉寶說同。而庾蔚之駁之。王儉與劉寶說同。而尚書參議又駁之。今按儀禮喪服云。為人後者。傳曰受重者必以尊服服之。疏引雷次宗之語。不言間代立後。通典引雷氏之語。稍有詳略。亦不言間代立後。徐氏乾學但據通典無所後父早卒之言。而未檢核儀禮疏。遂若雷氏主間代立後之說。而雷氏固無此意也。然徐氏言各親其親。為人之同情。間代取嗣。權而不失。經不悖於先王之道。則可謂深知禮意者矣。庾蔚之雖以間代立後為非。然其論為後子異姓。而本宗乏嗣者。宜以子後其本生父。仍不外乎間代立後之說。蓋窮於勢之無可如何。故不得已而出此耳。然而間代立後。究不如獨子兼祧。蓋出繼異姓。而本宗乏嗣者。止可令其子分嗣而已。身不可兼祧。此不得不間代立後者也。出繼同姓。而本身乏嗣者。既可令其子分嗣而已。身仍可兼祧。此不限於間代立後者也。然則有

兼祧之法。以彌其闕陷。則小宗且不必間代立後。而大宗更不必間代立後矣。或謂小宗之子可以出繼大宗。而不可以兼祧大宗。抑知小宗之子兼祧大宗者。由於大宗無子。小宗只有一子。故有謂小宗可絕。大宗不可絕者。此戴聖之說。而班固從之。何休亦從之。有謂大宗可絕。小宗不可絕者。此閻人通漢之說。而范甯從之。許猛亦從之。有謂大宗小宗皆不可絕者。此田瓊之說。而范汪從之。庾蔚之亦從之。今按儀禮喪服傳云。大宗者。尊之統也。大宗者。收族者也。不可以絕。諸儒謂大宗不可絕者。據此語為證也。又云。故族人以支子後大宗。嫡子不得後大宗。諸儒謂小宗不可絕者。據此語為證也。禮記服問引傳曰。君子不奪人之喪。亦不可奪喪也。準此以推。知君子不絕人之後。亦不可絕後也。然則小宗兼祧大宗者。大宗固不可絕。而小宗亦不可絕矣。或謂大宗之子。不當出繼小宗。亦不當兼祧小宗。抑知大宗之子兼祧小宗者。由於小宗無子。大宗止有一子。故有謂大宗支子不得出繼小宗者。此曹述初之說。有謂大宗支子不妨出繼小宗者。此張湛之說。南齊江革以大宗之子出繼小宗。既而因大宗無人。復還其本。是時僕射王儉議以駁之。幼子繼小宗為孫。此就張湛之說而推之也。尚書參議駁荀覲何琦兄孫可以為後之論。此就曹述初之說而演之也。今按禮記檀弓云。兄弟之子。猶子也。蓋引而近之也。使謂弟子當出繼大宗。

而兄子不當出繼小宗。則是兄可視弟之子猶子。而弟不可視兄之子猶子矣。先王制禮。不若是之偏也。儀禮喪服傳云。異居而同財。有餘則歸之宗。不足以資之宗。使謂大宗當取嗣於小宗。而小宗不當取嗣於大宗。則是小宗乏財者。大宗尚恤其窮。而小宗乏嗣者。大宗不憫其絕矣。先王制禮。不若是之恕也。然則大宗兼挑小宗者。大宗既有子。則小宗亦不啻有子矣。然猶有可議者。曰諸儒之中。達者不過魏晉。近者不過宋齊。似非舊典也。則請以漢代儒家深通舊典者言之。後漢書伏恭傳云。司徒湛之兄子也。湛弟黯無子。以恭為後。夫恭為伏生裔孫。世傳經學。涉歷兩漢四百餘年。當代儒宗。推為盛族。湛父理及湛黯兄弟。皆宿學名儒。恭亦克紹家風。不忘舊緒。何使此舉違乎經訓。豈有伏氏一門。竟肯首作厲階。遺議禮教。然則大宗承嗣小宗者。不可謂非舊典矣。然猶有可議者。曰伏氏兄弟。長者果非庶子。幼者果非嫡子。究無明文也。則請以同母嫡子確有明文者言之。三國志諸葛喬傳云。喬字伯松。亮兄瑾之第二子也。本字仲慎。初亮未有子。求喬為嗣。瑾啟孫權。遣喬來西。亮以喬為己嫡子。故易其字焉。諸葛瑾傳引吳書云。瑾少游京師。治尚書毛詩。左氏春秋。遭母憂居喪至孝。事繼母恭謹。甚得人子之道。今按瑾長於武侯七歲。其遊學京師。至早亦當在十歲以上。而遭憂尚在其後。則八歲之時。其母無恙。更不待言。是瑾本嫡

子。武侯與瑾同母。亦係嫡子。瑾以長子為大宗。武侯以次子為小宗也。夫諸葛氏為巨室高門。天下所共仰。武侯伯仲伊呂。固三代以後一人。瑾亦位冠吳臣。為當時所罕有。喬出繼叔父之後。武侯立兒子為兒。兩境胥無間言。千載不聞異論。然則小宗取嗣大宗者。不可謂無明文矣。然猶有可議者。曰諸葛氏雖係出繼而非兼祧。未為定論也。則請以諸葛氏兼祧允符定論者言之。三國志諸葛喬傳云。年二十五卒。子攀官至行護軍。胡武將軍。亦早卒。諸葛恪見誅于吳。子孫皆盡。而亮自有曹喬故攀還復為瑾後。今按喬無他子。攀既還為瑾後。自必承嗣恪之大宗。而兼祧喬之小宗矣。然此因武侯既有子瞻。故攀也去武侯之小宗。而歸瑾之大宗。毫無窒礙耳。向使武侯未有子瞻。以喬嗣爵。喬存而攀尚未生。恪即被害。斯時也。喬若不奉瑾之祀。則是繼小宗而絕大宗。無異於拔本塞源。裂冠毀冕。喬若不奉武侯之祀。則是忘教有成立之恩。亦將為名教所不容。況武侯無後。何以勸善。祀不可絕。必將有主。主其祀者。非喬而誰。吾知蜀漢諸儒議斯議者。惟有令喬還嗣瑾之大宗。而兼祧武侯之小宗。然後仁至而義盡。武侯之夫人黃氏。夙號賢明。如其爾時尚存。諒必不違公議。然則大宗兼祧小宗者。不可謂未有定論矣。禮記禮運云。故禮也者。義之實也。協諸義而協。則禮雖先王未之有。可以義起也。況兼祧之制。未始非古禮所許者乎。禮器云。

母輒議禮。郊特牲云。禮之所尊。尊其義也。故其數可陳也。其義難知也。太史公曰。書
闕有間矣。其較乃時時見於他說。議禮者欲知兼祧之古義。亦惟旁推交通。由比事
屬詞。以求其條例。庶不淆於聚訟之說也。歟。海甯蔣君寅昉。光緒輯其兼祧嗣母徐
安人節孝錄。介秀水高君伯平均儒。寄以見示。乞為撰文。余檢錄中所載。如秀水莊
君芝階。仲方嘉興錢君警石。泰吉所撰家傳。吳江沈君南一日。當所撰墓誌。皆言寅
昉本以大宗之子。出繼小宗。既而大宗乏嗣。遂還繼大宗。而兼祧小宗。安人不自恃
其撫育之恩。以奪宗爭嗣。為賢母所難之能。平湖顧君訪溪。廣譽復撰兼祧說。以申
此指。毓崧與寅昉未嘗識面。然觀於所述行略。惻愴溢於語言。想見其永慕慈輝。怵
慙篤摯。又重以伯平之請。不獲固辭。爰考證羣書。作兼祧之禮合乎古義說。以闡揚
安人之德。藉慰寅昉之心。而先質諸伯平焉。

張楚寶君子居記

汪士鐸

余自知驚下。不敢軼志於干祿。違昔賢量已守分之訓。性愛竹。苦屋宇仄隘。從友人乞文竹三四竿。明年老竹茁筍。筍先後次第。各森森具凌雲氣。不依附於物。物亦無攀援之者。以為介節幽韻。用自怡懌。合肥張子從余游。坐竹下。譚藝量。無與於道也。然張子幸有賢父兄。知其染余深。為築書堂治城山陰。琅玕數萬竿。一碧數十百頃。張子與其友檢書講藝於其中。涼飈徐來。戛戛作聲。與敲詠若贈答。余適往游。裴回不能去。張子句余記之。余取淇澳之詩。名之曰君子居。且謂之曰。昔王陽明居龍場。龍場多竹。陽明作節亭其間。日與其徒講學不輟。脩然若忘身世者。名其亭為君子亭。且自為文以記之。其後勲德爛然照今古。而或以為先生講學自此起也。且余聞之切磋琢磨。君子之學也。非勁直無以自立。不虛其心。何以受天下之善。不靜其氣。何以研萬彙之蕃變。不疏其節目。何以網羅一世之英傑。而集思廣益。道不聞窮達。願張子勉之。以無負賢父兄之期望。無若余之頑鈍斯可矣。

春秋不稱天辨

龍啟瑞

春秋王不稱天者三。莊元年冬。王使榮叔來錫桓公命。何氏云。不言天王者。桓實行惡而乃追錫之。尤悖天道。故云爾。文五年春。王使榮叔歸含且昭。何氏云。去天者。含者臣子職。以至尊行至卑事。失尊之義也。三月。王使召伯來會葬。何氏云。去天者。不及事。刺比失喪禮也。

古之言春秋者不一。其最善莫如孟子。孟子曰。春秋天子之事也。孔子曰。知我者其惟春秋乎。罪我者其惟春秋乎。蓋夫子所修者魯史。而所持者周天子之權也。守天下者莫貴乎天子。正天下者莫重乎天子之權。唯周天子不能自持其權。故孔子即空文以寓賞罰。而為之代行事。是春秋之所以尊王者。以其名分存也。若其實。則非聖人之所得而議也。假聖人而得議周之事。則所僭者乃天之權。而曰春秋天子之事者。不亦小哉。異哉。何休氏之以王不稱天為刺譏是非之說也。夫王之號自夏商以來。未之或改也。彼所謂天王者。吾不知始於何時。母亦春秋時之人言如是。聖人亦沿而不改歟。如謂其為刺譏也者。則桓之行惡。宜絕之於生前。何以十八年之內。書天王使人來者三。而獨一貶於生後之錫命耶。若成風之歸含。贈與會葬。則前此天王使宰咺來歸惠公仲子之賵者。抑又何說。若謂含為臣子事。會葬為不及時。

是舍其大而責其細。不應當天王以重罰也。嘗考公羊成八年傳曰。其稱天子何。元年春王正月。正也。其餘皆通矣。繹公羊本意。蓋謂稱王者為正。其餘或稱天子。或稱天王。皆可以類相通。何氏欲自直其前說。遂不深言。所以相通之義。而贅之以刺譏。是非之文。夫既曰刺譏是非。則所謂相通者何在。舍明明可據之傳。而倡為異說。是欲專執己見。而不顧削足以適屨也。何其悖哉。夫固天下之無王。而託王以行法。已又黜削之。而自干夫無王之罪。斯固孔子所不敢為。而孟子所不敢信也。其亦可以無辨已。

宋伯姬論

春秋書宋災。宋伯姬卒。三傳釋之。皆以為待姆不至。守義而死。獨左氏譏其女而不婦。或問如伯姬者。可以為賢乎。曰。守禮不達於經。自殘其身。而貽子以殺母之名。賢者不為也。然則春秋錄伯姬之始卒。繁而不殺何也。曰。伯姬固賢也。特不如傳之所云。若實如傳之所云。則其詞之繁而不殺也。亦宜。竊嘗以情揆之。伯姬當日尊為國之大母。火作。公當來救。婦人之義。保姆不在。宵不下堂。然從子則無不可者。且當時亦不聞有公來救。而姬不去之詞也。如傳之言。則必宋公不在國而後可。或宋公所救。有急於姬者。而後可。否則有待傳姆之時。而謂公不得至也。有是理乎。曰。然則傳

之所傳。果盡無其事。與曰事或有之。而不盡如傳之所云也。伯姬蓋猝然遭於火。大
始至而不知其害之烈。遂稍遲以待其姆。遭姆至火烈而奔而救之。則無及矣。雖然。
事吾知其如此也。若夫道則吾有以知其不如此也。蓋古之言道者。曰凡義所在。有
死無二。又曰身體髮膚。受之父母。不敢毀傷。此言守死之道。苟未至於義。必當死之
時。尚不殘殺其身。以墮父母之遺體也。伯姬即不待姆而自脫於火。君子尚不得謂
之非義。何也。天下之事。常變固自不同也。如以處常之禮。而責之處變之人。則臨于
戈而為揖讓。亦謂之義可乎。若夫春秋之所以詳而錄之者。則有說矣。聖人之作經
也。當於事之近正而易惑者。則不惜大為其詞以明之。伯姬之事。聖人有以知其必
傳於後世也。傳於後世。而婦人女子有聞而慕之者。將殘其身以立名。惑於禮之近
似而忘其大義。不如詳錄之以示其尊崇之意。而於納幣也。則書。致女也。則書。衛晉
齊之來媵也。亦不一其書。若曰姬之賢。固守待其卒而知。亦無因其卒之一事而遂
賢之也。夫如是。則天下皆知姬之有以為賢。而不至矜其事而毀其行之過。故三傳
之言。惟左氏為近正。而於經之意。則猶有所未盡也。然則公穀之說。將何所本乎。曰
春秋大義。非聖人所親授。後儒守其常而不能通其變。遂於行之過正者。而亦以為
不可易焉。申生急子之流。其所處死者。皆是物也。雖然。如二子與伯姬之志。則亦可

以無惡矣。

陳平周勃論

古之大人弭天下之亂者。必有不得已焉。故與其有亂而弭之。不如無亂而吾安之。為愈也。與其既亂而止之。不如及其未亂而先止之。為愈也。夫亂不亂存乎天。天之所為。非人所得知也。而君子終不以天之難問。而廢夫人力所自盡者。則以救諸目前之可恃。而俟諸將來之難自必也。火之焚於室也。雖里巷之人。猶將走而救之。不俟其熱及於吾廬也。既及吾廬。將有不可為者矣。惜哉。以平勃之賢。處可預防之勢。而其計乃出於救火之人下也。呂后初臨朝。平勃與高帝諸臣共列將相之位。方其欲王諸呂。先問王陵。陵不從。復問平勃。夫亦自知不義。而懼為大臣之折也。假令平勃附王陵之正。堅執高帝之約。呂氏雖橫。安能重違大臣而恣行己意。且其時兵權尚不歸呂氏。呂后欲假產祿以王。實欲假以兵權之漸也。杜亂源者。必自漸始。則莫如先使之勿王產祿。不王。兵權不歸呂氏。平勃可安坐而弭其釁。何呂氏之能為。或又曰。呂后陰鷙。如平勃不從。亦必中以他事去之。去之無益。不如隱忍以成吾事。是不然。大臣之事君也。於吾力之可正者。則正之。不敢微倖於異日。而姑待也。且設是心者。亦謂平勃知呂后年齒已長。彼即旦暮晏駕。產祿庸子。終無能為耳。此尤為

悼之甚者。萬一產祿既王。呂后未死。而二子不為天所祚。則國家之事。更諉之誰任乎。高帝之與呂后論相也。首王陵。次平勃。豈不陰識陵之守正。而欲二子有以佐之歟。既不能佐。又從而非笑之。其成功蓋亦天幸焉。而未可據以為能也。夫平勃之事。既往而不可復矣。而後之為人臣而值事變者。慎勿藉口於有待。而終至於不可及哉。

粵西團練略序

今天子初元。廣西羣盜之起。蓋數年矣。其芟夷漸滅。大小以數十計。比其訖事。恆得力於民間之團練。於是朝廷命順天府尹無錫鄒公鳴鶴巡撫吾粵。鄒公因奏留今升布政使前廣西按察使調任甘肅按察使吳公鼎昌。偕今升河南布政使前廣西右江道嚴公正基。總理團練。而以在籍紳士福建道監察御史朱琦。翰林院侍講龍啟瑞。聯屬其鄉之人。使歸於率。先是琦啟瑞嘗受呼於前中丞鄭公祖琛。董辦本省之團練。至是始設局省垣。遴擇紳士。隨同委員。周歷各郡。提點勸諭。凡數閱月。而通省之團務普成。於是章程冊籍。蒼萃省局。啟瑞擇其規條之尤善者。與其公牘文字。之有裨時務。及團名丁壯義烈事實。可備他日掌故者。分以四門。彙為一編。名為團練輯略。畧執筆而為之序。曰。自井田守望相助之法廢。而衛民者專恃兵。自兵力之不足。始藉助於民間之團練。團練者。即古寓兵於農之意。而變通其法以適時用者。

也。然考諸古。自晉惠帝大安二年。鎮南將軍劉宏討張昌。始有義軍之名。同時周比。賀循輩。皆以薦紳先生起兵於家。以討昌之黨石冰。卒滅之。南朝以來。如裴駿魯悉達。周迪之屬。類以鄉兵捍賊。取勝。開元後。府兵法廢。諸州始團練民兵。安史之亂。諸州皆置團練使。然當時之士兵。多為武夫悍卒。所訕笑。聞當推尊其故。蓋有人倡率。則治。無人倡率。則敗。威令之迫於上者。鮮效。義憤之激於民者。有功。其大較然也。今粵西團練。徧於外郡。無所強之。而事成。有以導之。而民從。其故何哉。被盜賊之患。深保室家之情。切。而習於攻戰之事。熟也。蓋自道光二十一年後。夷務起。粵東粵西鄰省。毘連。地方大吏。於梧州辦理防堵。事平後。壯丁失業。猾黠之徒。相聚為盜。煙販鹽梟之屬。從而附和。又外郡地多山場曠土。僑招粵東客民。佃種。數世後。其徒益繁。客主強弱互易。其桀者。或倡為西洋天主教。以蠱惑愚民。用是黨滋益多。州縣官欲繩以法。則恐生他變。欲據實上陳。則規避處分。而畏干時忌。逮釀成大患。則破敗決裂。不可復治。而斯時之民。甚者。或經十餘戰。次亦遷徙數四。弱者。或流離轉死山谷。強者。則率其父老子弟。與賊抗拒。以保聚於鋒鏑之間。蓋粵僻處荒裔。王師調發。難以時至。本省兵馬。各有守地。顧此失彼。輒不相及。即及之。而兵力不足。或用為借助。為其嚮導。比比而是。然至是而富家巨室。捐貲以助餉者。丁壯冒白刃膏塗原野者。紳

士之督率奔走者。或轉戰。或破賊。經歲不家食者。用民之力。亦幾於盡。又得文武大吏督兵壯剿除。然後地方寇盜。幾於蕩平。聖天子軫念邊隅。嘉與粵西人士。能自相捍衛。紳民有殺賊立功者。立予甄敘。賞過其勞。殆為吾輩初意所不及。究其所以得此者。固非一朝夕之故也。後之覽者。知其所由然。則所以為難之故。蓋可識矣。凡團練之精壯者。大抵見賊多處也。不然。則民力之富厚者也。不然。則得賢有司倡率之者也。三者不可得兼。而就今日已成之事論之。尤以賢有司為急。蓋有司賢。則總團之紳士治。總團之紳士治。則分理之紳士治。而一方之團練可得而治也。有司不賢。則視紳民如外物。紳民亦從而外之。甚則用不正之人。參預其間。雖已成之團練。可以復壞。夫民經流離散亡之後。幸而恃有團練。又賴賢大吏之力。始可勸底於成。至不幸有司不賢。則可以壞之。復歸於弊。夫家有芒刃。人知戰鬪。用以殺賊。則可愛。反其道以行。則甚可慮也。事之弊。則為吏者有以藉口。而斯民適受不韙之名。又豈今日始事之所及哉。然則是編之成。固有待乎其人。而非徒以成法待將來也。既以復於諸公。遂質之侍御。而弁諸卷首。

讀曹參傳書後

史稱曹參代蕭何為相。舉事無所變更。一遵何約束。吏及賓客見參不事事。來者皆

欲言參輒飲以醇酒終莫得開說以為常世因此此賢之龍子讀之而歎曰參之賢果僅及此哉此去以私意亂法禍天下者一等耳烏得賢參果賢當躋漢德於唐虞三代之盛安肯幸其脫於區區之暴秦並恬然高卧而不知所有事也參之時天下未為大治也母后擅權於內匈奴憑陵於外凡後世賈誼董仲舒所言風俗之未厚經制之未定禮教之未修更化之未速其流極至景武之世其源皆自參之時發之參果為天下材當易其抵冒殊捍之習改弦更張遠絕亂源修明儒術佐少主光顯高皇之丕緒而措天下於磐石之安其功烈豈僅與刀筆吏比長而已耶且天下之大固未嘗一日無事也堯之時曰萬幾舜之志曰百志古聖人處太平之世則以不能久安長治為憂其身未盡乎一日則必有數十百年之計如參所為固足以自完其身而已且參獨幸而薨於孝惠之世耳使天假之年得見呂后產祿之事不知參將以歌謠日飲者治之耶抑皇然慮患之不暇給也或曰參之時天下新脫於兵革元元之民莫不樂安於無事夫有為者非擾民之謂也朝廷震動恪恭於上而百姓相與嬉游於下吾日事事焉而天下不見有為之迹此非參所能及也參之智僅足以自知能不及何故兢兢焉守成法而莫之敢易其與夫變法召亂者固賢矣後之人處有事之時而託不事事之名以為高者其鮮不開天下之亂源也哉

書歐陽子縱囚論後

歐陽子論唐太宗縱囚之事。謂其上下交相賊以成此名。善哉乎言。其於當世之情事盡矣。惜所以處囚者猶未善也。竊嘗推而論之。以為既謂之曰囚。則決無可縱之理者也。如歐陽子之言。上既失刑而縱之。縱而來歸。則又殺之無赦。夫既存一必殺之心。則何必縱。既縱之而有來歸之義。則又何必殺。此說之不可通者也。而又縱之而又來。則將何以處之乎。如因其實為恩德之致而赦之。則安知前者之來為非恩德之致也。同罪而異罰。尚不可謂仁。今同罰而異赦。獨可謂之義乎。如又來而又殺之。是以民命為戲也。王者不忍為也。歐陽子亦知其說之無以處也。而歸之於必無之事。夫治天下者。安可因其必無而偶為之。假因必無而偶為之。則今日之偶者。其果合於義耶。且安知天下之不倖吾偶而以為常者例也。然則如之何。曰由吾之言。既謂之曰囚。則決無可縱之理者也。王者之持政也平。故致罰惟求其當。而不示民以可倖之恩。慮惠也深。故用法必守其常。而不望民以難得之事。夫以至平之心持政。而以至深之謀慮惠。則唐太宗之事固有所不行。而歐陽子之說亦有不必用者矣。然則偶一行之終不可乎。曰偶一行之。是待今之縱者則為寬。而視他日之刑者則不恕也。故論處囚之道。必歸於無縱而後可。

跋蘇明允集後

明允著幾策一篇。首言審敵。其論宋之弊。謂以弱政敗強勢。必為之強政。而天下之勢。可復歸於強。竊嘗謂當時無舉其言而行之者。苟舉而行之。則宋之亡可立而待。將求為南渡之偏安而不可得。明允固嘗論天下大勢。如人身然。人固有血氣衰竭。醫者誤投以淺茸劇劑。卒燥其陽。以至於不救者。往往是矣。今有人道渴而仆者。或以水飲之。立斃。有餓而僵於市者。立與之飽食。亦斃。非水之不可救渴。食之不可起餓。而用之者過於急也。以強政矯弱弊也。何以異此。夷考古之帝王。處積弱之勢。而能自振拔。以至於強者。惟周宣王一人而已。宣王中興事業。頗見於詩。今觀其詩。不過因畋獵而講武事已耳。撫流亡之民而安集之已耳。中國外夷有不馴服者。則命將出師以討伐之。初未嘗以繁刑嚴誅束縛斯民。而震疊之使必從也。夫以繁刑嚴誅用之於嘽緩偷懦之後者。是猶積小石而過湍水也。一旦潰決。則必至於浸溢漫衍。不可收拾。後將欲返乎一日之無事而不可得也。夫宋之亡。固積弱之弊使然。然尚得為南宋偏安之局者。祖宗深仁厚澤。有以漸漬乎人心而不忍去也。今一旦而以尚威之說矯之。吾恐威未立。而人之畔而思去者不少矣。然則遂因而任之如何。曰惡乎可。先王之於治也。匪強其政也。而務強其心。心強而政強。如人身氣脈壯盛。而

耳目百體皆為之效用而不倦也。心之弱者。政雖強而亦弱。如懦夫叫呼跳踉於前。而識者知其中之先餒也。然則強心之道如之何。曰。君者天下之心也。奮發之氣。自上始之。而朝野內外皆振動於不自覺矣。後有處積弱之勢者。得吾言而思之。亦庶乎其可也。

致馮展雲侍讀書

前奉手書。諸務空集。尚稽裁答。然每念肫然見愛之誠。與殷然下問之意。未嘗不縈回於中而不能自己也。計維職業清閒。詠歌不廢。慰甚。竊嘗謂人雖至促迫之時。亦必有一二刻之閒。可以安坐讀書。今之居館職者。終日脩然物外。無世俗之事。關其慮於此而猶不能博考古今得失善敗之蹟。與夫禮樂文章之用。以備他日當路而可以自見者。此與凡民之情遊者何異。然此何足為卓然自命者道。能知所先務而不泛用其力。斯可貴耳。治經自是學人第一要義。而求其有裨實用。則史籍較經籍為多。荀卿子曰。欲觀後王之蹟。則於其燁然者已。今之史冊是也。經術固不可不明。然行之貴得其意。如徒拘於章句訓詁。則是俗儒之學。若欲按其成法。推而行之於世。則如井田封建。用之於古則治。用之於今則亂。苟非其人。道不虛行。故空談經學者。正如夏鼎商彝。無適於用。要惟約其理而反之於身。因以推之於世而不泥於其

迹者。庶有當焉。然則今日之學。亦先學其有用者而已。某智能寡薄。向為無本之學。又中廢而不克自振。今僅用之以教人。尚支絀不足於用。則異日之施行於世者。可知已。因閣下殷殷垂問。故不私其愚。而思有所贊於左右焉。

致曾滌笙侍郎書

月初六日。專人還。接奉手書。知前件遠蒙關注。某此事實出於萬不獲已。寸心可以對天地。質鬼神。若世之所謂謹默畏慎者。難免不以為非。要亦不足聽焚也。數十年來。士大夫以含容為忠厚。以寬大為美名。如有持正不為苟同者。即以刻薄之名加之。立見其僨事。而不肯得罪於同官。即使其殃民。而不肯曲從夫清議。夫不忍於一人而忍於百姓。不忍於同僚而忍於吾君。其為害詎有極耶。天下事所以流失敗壞而莫可挽回者。孰非若輩有以釀成之也。某平生實不肯以苛論繩人。即今日作鄉紳。亦不肯不為地方官設想。如使我當之。而力不足舉其事者。斷不肯責望當局。今日吾鄉之事。實為此一二人所敗。如使盡其心力。及早為之。雖庸才亦必有以自見。受人之牛羊。而不為之求牧與芻。且驅而致之虎狼。而莫之省憂。徒束手號於眾曰。吾無才。則當受牛羊之時。何不皇然自謝其不敏也。且今日之事。又不止於無才而已。而又幸其主人之多難也。而忍從而敗之。顛倒是非有無。直以為旁若無人者。彼

其心之無君亦已甚矣。某雖不才。蓋亦廁身士林。略知大義。同擊其敗。君害民之事。實覺於心不甘。如律以居是邦。不非其大夫之義。則為春秋時分土分民者言之。不才以王人而與公事。烏可以此為例。又有謂所言雖是。但惜其晚。而於事無益。某則謂不至今日言之。亦不見效。如謂晚而無濟。則他日言之。更屬無益。不如早一日言之。更有一日之效。生平賦性愚癡。惟正直二字。自謂可以矢諸神明。嘗謂好惡如有悖於大公者。則生不可立於大清之朝。死不可以入先人之廟。執事所謂邦之司直者。庶其聞而諒我乎。北事承於續函。示悉感荷。以後如有所聞。更望寄示。天下大局。固已不堪設想。吾輩為一日臣子。便當盡一日職分。主德仁明。民心未去。撥亂反正。安知不在今日。旌麾駐臨。匪遠鄰封受庇。瞻望風采。全義無窮。

上梅伯言先生書

伯言先生閣下。憶前歲春間。蒙賜先人陷幽之文。當即肅復。敬申哀謝。道遠未知何時得達。比逆賊踰嶺出。息耗益梗不通。聞先生陷危城中。曾作二詩感懷。末由奉寄。嗣於新之方伯處。知先生已脫賊自歸。移家黃野。為之欣忭者彌日。曾粵西土匪益熾。牽於集鄉兵。議團費。終日辛辛。唇吻枯燥。連晚不得休息。又地方官相與違難。噫。氣填胸肺間。因自戒執筆。恐發摠太過。以益時忌。故不能以一函詢近况。道款曲。然

依企之誠則未嘗一日而置諸懷也。伏維遐迹休閒。興居安善。金陵異族偏處。聞數十里外村落尚可安居。未審近復何如。憂患播遷之餘。以道自勝。親近圖史。神明不衰。固當為先生祝之耳。近年變端殊大。非前時意料所及。然先生文集中上汪尚書書已言之。良佩深識遠見。抑某竊有進者。姦民固非重州縣之權不辦。今州縣雖無權。然察一結盟聚黨之姦民。固力有餘也。特上之督撫。不肯擔代處分。又樂以容忍。欺飾為事。有一二能辦之員。且多方駁飭之。使逆知吾意而不敢為。然督撫亦非真以為事之宜如此也。大抵容身固寵。視疆場若無與。苟及吾身幸無事。他日自有執其咎者。又上之則有宰相。風示意旨。謂水旱盜賊不當以時入告。上煩聖慮。國家經費有常。不許以毫髮細故輒請動用。由前之說固非古大臣之所以事君矣。由後之說其所以防冒濫非不善也。然疆吏因此而不敢辦盜。逮其潰決則所費者愈多。為督撫者類皆儒生寒素。夙昔援引遷擢。不能不藉助於宰相。如不諮而後行。則事必不成。而有礙。是以受戒莫敢復言。蓋以某所聞皆如是也。金田會匪萌芽於道光十四五年。某作秀才時已微知之。彼時巡撫某公方日以遊山賦詩飲酒為樂。繼之者猶不肯辦盜。又繼之者則所謂窺時相意旨者是也。當其時馮雲山韋振胡以沈等。蓋無人不為本地紳民指控。拘於囹圄者數月。府縣以為無是事也。而故縱之。逮

其起事始以八百人聚於桂平之紫金山。紳民知必為巨患。集鄉兵千餘。自備口糧器械。欲往剿捕。其公揭於道府。但請委員督視。使知非私鬪而殺人。得免於抵償。蓋其時粵西初有團練。而民之畏法如此。道府顧置之不問。紳民再三催促。始委一候補知縣薩某應之。而夫馬又不時給。委員因遂巡不去。賊聚黨。瞬至巨萬。團練弱。且噉官兵之募為助。遂羣撒手。而賊勢滔天矣。蓋某所聞於官中者如此。此不能不為之太息痛恨也。今天下州縣多矣。即一省不下數十百餘。安得盡賢者為之。惟督撫得人。則州縣不期而自治。督撫不肯欺蒙。皇上則州縣亦必不敢欺蒙督撫。此其勢然也。竊謂如先生之論。使州縣得入為御史。固足以激勵人材。而建白不至為空言。然列薦牘而上之者。督撫也。如使他人薦之。恐非時政所宜。亦未必遂公且明於督撫。州縣雖賢。安能違其意而自致於高明哉。惟宰相實有抑揚督撫之權。督撫皆得其一言。以為事勢之輕重。故從古天下之治亂。未有不由乎宰相者。今粵西之始禍。可觀已。此蓋先生文之所未及者。故某引伸其說。以為世鑒。先生其然之否耶。數年里居。因圍繞事。時與官吏交涉。竊見今之所患。有甚於昔。殆親見前人覆轍而躬自蹈之者。如使一誤再誤。則為憂更大。去冬曾據實瀝情入告。廟堂初意極為慎重。浸淫為持魁柄者所遏。彼人不能扼我。而能忌我。又賊勢滋蔓。凡鄉團之良如唐

子實輩皆敗不肯出。某於是不得不奉母引去。忘我者亦不能留也。蓋某之所以出處進退者如此。其委折非言可盡。自十月十一日。自家起程。今日始抵衡陽。將取道襄樊以達秦中。謁見座師王雁汀中丞。擇便地安置老弱。再圖北上。今之時勢。該何容易。況以空疏無據者為之。其能有萬一之濟耶。儻容隱居奉母。始得一寬閒寂寞之區。則私願已足。先生其必有以教我。滌笙侍郎一軍。居然近今豪傑。觀其起事之始。其氣足以吞川瀆。撼山嶽。而幕下人才亦皆一往無前。陵厲蓋世。宜其有以攝凶頑而吐氣也。然自九江而下。賊愈悍。我愈孤。江北之蜂屯蟻聚者。其志量尤不可窺測。則恃養生之福命為之。滌笙到此。則更為其難矣。前歲感懷二律。並今歲立春日寄懷近作。附錄呈正。先生文集曾否刻成。便乞以一帙見寄。今年在粵。與伯韓子實哀集師友文刻之。而以子實居其名。命曰涵通樓師友文鈔。先生文從伯韓鈔本錄出。近作則先人墓誌黃个園傳皆與焉。頗有集隘不能盡登之憾。此外月滄先生子穆伯韓少鶴及某六人。為書九卷。先生及伯韓少鶴皆二卷。而少鶴及同鄉蘇虛谷之詞合鄙作共為一卷。凡十卷。今已裝釘印行。詩鈔擬俟續刻。蓋貴與目皆不能給。而先生詩集從前未經錄出。不知能以副本見寄否。兵戈擾攘。勞生僕僕。無補時艱。獨平日文章之好。結習未忘。常自笑且自憐也。獨以識一時師友淵源之緒。則先生

或亦有取焉。道遠書何能悉。

答羅生書

自歸後。一接手書。知侍奉萬福。甚慰。省垣人事紛擾。不服作復。既念足下書。豈可不復者。况僕又有不能已於言者耶。方今友朋道替。心非面訣。所言都非由衷之意。位望稍以懸絕。便不敢一加管議。或向人前稱述過失。用快己意。而相見乃莫肯一言。此固其人之驕傲怙惡。有以致之。亦非朋友忠告之道也。足下乃勤勤拳拳。能指吾所不及。並告以持正用人之要。此固僕飲食夢寐所不能釋。而他人所習之而不及知。知而不能言者。不圖足下一旦傾瀉肝肺。相愛之甚。至於斯極也。其為惠益。豈有涯量。雖然。君子之於朋友也。不責以所苟難。貴因事以察其心。而知其萬不獲己之意。方今人心務在趨利。不知有義。作事不求實用。但務虛名者。比比皆是。僕在此力求矯正。便已動相齟齬。不知者謂為氣量褊狹。事事與人爭勝。然能諒其心之持正者。固不乏也。此亦足下所夙聞。尚以我為盡力周旋者何事耶。僕則何所嫌疑。顧忌而周旋何人也。又謂有論列於當道大臣之前。不免稍存趨趨囁嚅之態。僕於不知己之前。不欲盡言者。則有矣。至其推心置腹。以端人待我者。固未嘗不慷慨正辭也。僕於官何所統屬。而有所畏避。而不敢言耶。至不在其位。不謀其政。所不當言者。

又可盡責之僕耶。說佞貪濁之徒。屏而去之。此僕之所能。然能保其人之不出吾門而已。其出於他途者。吾力能抑則抑之。不能抑則以術箝制之。使無害於大局。欲盡鋤而去之。固不能也。鄉邑雖大。人材可一二數。間有備員從事者。要不以置之重地。僕居鄉無尺寸柄。徒以當道信任。究攝通省樞要事。又不無分任。豈能悉聽指揮。所指天誓日。力求無負者。惟公正二字。此心未之或忘。而暗中維持匡助。自問亦復不少。顧其中之委曲。則豈能人人告之。外間物議。亦所當然。至於怨者之口。固不必論也。然聽言者又豈可略觀大意。便謂其說可據。如謂某有不善。便當求其事以實之。其事果實。又須求其致此之故。有迹非而心則是者。猶當諒之。豈可據空談之一言一事。便謂其有所不足哉。不知足下所謂物議者。亦曾察之否。近今朋輩好為高論。置身局外。侈口譏訕。視斯世無一可意。及引之當局。喑不發一詞。如是者。僕實恥之。願足下毋固斯習。僕在省中。號為以苛論繩人。然必此心所萬不敢出。及昇之我而力能舉其事者。始敢議他人所不足。反是者。未敢出諸其口也。足下之更歷天下事。希矣。及之而後知。履之而後艱。願他日無忘斯言。若乃吾道不行。拂衣徑去。此君子立朝者之所為。僕今日居鄉。何遽至是。且僕非不願為高蹈。而有戀於此也。獨念上自九重聖主。下及地方大吏。孜孜以此為事。異日播之國史。傳之遠方。鄙人當局。

或不無萬一之助。夫不樂聞足下之言。則可置之不辨。辨之詳。且欲實徵其事。僕之有意於聽言。而非敢於怙過也明矣。繼自今有可言者。願足下言之勿忽。永安事非筆墨可盡。入春來。舍間自老母以下各平安。念足下不久當來。故不具白。

送呂介存南遊序

古之時無所為遊士也。蓋自其少時。則有鄉黨庠序之教。為之師者。率皆閭師黨正。鄉大夫三老五更之屬。故學問之道。不出乎里門。而自足。自小學曲禮至詩書六藝之文。世家多有。其朋儕之羣萃州處。則又以備其講習觀摩之具。使之不易其心。而遷其業。暇則遊於鄉校。以議論學業之善否。有不率教者。則作為青衿之詩以刺之。當是時。士之去其鄉而遠遊者。未之有也。周道衰。學校廢。陵夷至於戰國。而遊士始多。然彼皆逞其辭說。以取一時之功名富貴。卒未聞以訪求道德為事者。獨孔孟之徒。多遠涉異國。必求得當世之聖人為之師。吁。孔孟而不遇時。使孔孟而遇時。則將復學校於成周之盛。又安肯率其徒日僕僕於風塵內也。秦漢以降。教人之法愈失。士之有志於學者。或不得所師承。於是始執業遠出。思以博求當世之名。人。聆其所傳之緒。士當斯時。苟伏處里門。大率荒僻固陋。不為當世齒。然則士之遊而學。而非遊。幾無以善其學者。豈非庠序之教不立。而師儒之官。或名存而實不足。厭人意歟。

余友呂子介存年逾冠。一日忽舍其家人。來遊京師。問其求。曰無所為。問其行。曰吾沿湘泛湖。逾於江河。達於燕。將馳乎齊魯之郊。遂放乎吳越以歸也。君之遊可謂壯哉。迹其意。蓋亦將博求有道之人。與上下其議論。歸而就學。以補其不逮也。余之陋。無所可益於君。而獨以慨教人養士之法。今有異於古所云者。顧其異又不自今始也。然則君之行。其安能以已乎。於其別。因書之以為贈。

嬰碁課誦圖序

王拯

嬰碁課誦圖者。不材拯官京師日之所作也。拯之官京師。姊劉在家奉其老姑。不能來就弟養。今姑歿矣。姊復寄食甯氏。姊於廣州阻於遠行。拯自始官日。蓄志南歸。以迄於今。顛頓荒忽。瑣屑自牽。以不得遂其志。念自七歲時。先妣沒。遂來依姊氏。姊適新寡。又喪其遺腹子。煢煢獨處。屋後小園數丈餘。嘉樹蔭之。樹陰有屋二椽。姊攜拯居焉。拯十歲後。就塾師學。朝出而暮歸。比夜則姊恆執女紅。篝一鐙。使拯讀其旁。夏苦熱。輟夜課。天黎明。輒呼拯起。持小几就園樹下讀。樹根安二巨石。一姊氏搆衣以爲碁。一使拯坐而讀。讀日出。乃遣入塾。故拯幼時。每朝入塾。所讀書乃熟於他童。或夜讀倦。稍逐於嬉遊。姊必涕泣告以母氏劬勞瘁死之狀。且曰。汝今弗勉學。母氏地下戚矣。拯哀懼泣告。姊後無復爲此言。嗚呼。拯不材。年三十矣。念十五六時。猶能執一卷。就姊氏讀。日惴惴於悲思憂戚之中。不敢稍自放逸。自二十後出門。行身居業。日即荒怠。念姊氏教不可忘。故爲圖以自警。冀使其身依然日讀姊氏之側。庶免其墮棄之日深。而終於無所成也。道光二十四年甲辰秋九月。爲之圖者陳君名錄。爲余丁酉同歲生也。

王剛節公家傳跋尾

英吉利重犯定海。城亡之日。王剛節公錫朋及定海鎮總兵葛公雲飛處州鎮總兵鄭公國鴻同日殉。余嘗讀葛公年譜而為之志。今讀上元梅先生為王公家傳。言二公當日事大略同。獨葛公年譜言公守晚峯嶺。葛公守土城。此言公守土城。而葛公晚峯。余志與梅先生傳皆據兩公家狀以書。而有此牴牾。何哉。考城之陷。實自晚峯兩家子弟。豈心有惡乎。是而故為外譌者歟。抑皆不親目當日事。而傳聞失實歟。當二公之殉。大臣奏章言葛公死東嶽宮。乃據當日諜報所言。東嶽宮在土城。葛公死實轉戰至竹山門。定海縣民徐保求屍以歸。其言宜信。而諜者第知城危時。葛公在東嶽宮。則以為城陷戰亡。必死其處耳。然則葛公之守土城。於此乃益有徵。且以定海本鎮兵。而當土城之衝。於事理亦宜然。然此皆不足論。論其大者。則二公皆非所謂折衝疆場。有死難不可奪之節者哉。且晚峯之陷。徒以未得礮耳。持飢疲數千之卒。捍懸海之危城。當敵大隊。譬猶徒手以搏豺虎。久必力盡而自斃。世豈有咎其為豺虎所爪噬之一臂指。而以為不力者乎。夫何足諱而為之掩也。始定海既復。夷艘寄泊海墻。夷人登岸。雜市賣貿易。欽差大臣裕謙執諜者二人。憤割剝馬而張其皮城門。夷聞大恨。聞人言公力戰時中賊礮傷一足。乃陷於賊。賊效裕公所為而糜其屍。嗚呼。豈不尤慘烈哉。三鎮同戰沒。而公屍未歸。則或此言其可信也。司馬遷曰。

人皆有一死。而或輕於鴻毛。或重於泰山。彼輕重得矣。則或一決而死。或菹醢而死。等死耳。乃吾觀古忠臣烈士。當其被禍尤烈。則後之人尤感激焉。抑獨何歟。夫人之心。必有所之。彼之於利祿名位者。日顛倒於膏粱文繡酣恭怡悅。人見之者。且將厭焉。而彼方泰然自以為得也。忠臣烈士。崎嶇險難。或展轉刀鋸鼎鑊之間。淺夫陋人。攢眉蹙額。以為大感。至相悲涕。亦安知夫受之者不心甘焉。如人奔走於塵囂。倏然而乘清風。出浮雲。以遊乎壻壻之表。猶夫利祿名位之徒。之泰然方自以為得耶。孔子曰。求仁而得仁。人能各得其所欲得。而又何憾焉。公任壽春。尤得軍士心。壽春天下雄師。驍勇善戰。公所將數百人。至定海。多從戰沒。罕生歸者。吾故因讀公傳。論傳所不及而並著之。以備史官採錄云。

嘉興錢先生家傳

先生諱泰吉。字輔宜。自號警石。先世本何。居浙之海鹽甘泉鄉。養於邑錢翁。為吳越武肅王十四世孫。承錢氏數傳寢盛。至先生曾王父贈太傅文端公。益大顯。王父汝慤早世。以弟汝恭子嗣。曰復。官大興縣令者。先生者也。先生早敏學。年十八補嘉興縣學生。四年。食廩餼。又十年。以數困鄉試。援例為校官。及選海甯州學訓導。年甫三十七也。總角為詩文。即縱橫馳騁。受六經後。好聚書。簽排甲乙。大興公顧而喜。舉所

藏書數千卷。畀之大興公喪。奉母沈太恭人扶歸。伯父某試之詩文。則喜。又舉所得語。溪吳氏藏書數百卷。悉予之。且謂其從兄衍石曰。善誘若弟。自是先生日就衍石論學。禾人稱曰錢氏二石。自少至老。兄弟摩切數十年。弗少衰。衍石者。名儀吉。以名進士官給事中。海內所稱心壺先生者也。先生既高材。躡場屋。自樂校官。不復就試。肆力為古文詞。其要本於性情之真。養之以正。不為偏雜。故氣和而體醇。其精尤在賤疏考證。自先世遺書外。遇善本異籍。非力所必不能得者。悉購藏。或假錄焉。在海昌三十年。及以子應溥封。老將去。又為州人舉主書院數年。有書數十簞。大半丹鉛所勘。訂於四庫名籍。幾徧。兩漢書元文類尤精校者。目為曝書雜記。兩卷百餘條。自道所得。成一家言。海內學者及藏書家。爭購傳之。為校官。嚴身教正士。習海人羣敬愛之。大府計吏。將以薦擢。則力辭謝曰。吾祖父皆久縣官。實政在民。吾故知縣令難為也。後其友馮柳東將辭校官為縣令。先生作書極尼之。然於民生利病。講權深至。大府廉其才。嘗以開濬備塘河事。屬之先生。舉民所不便者為牧言。斷斷往復。辭不預聞河事。既而牧乃大服於貞孝節義。尤亟表揚。勸修學宮。集餘貲為海昌備志。成舉所得。應旌義者。節孝千數百人。達於大府。再三必得請而後已。表鄉農朱興仁。聘妻張殉夫事。旌於朝。及為州。張氏作適孫攝重議。時人尤服儒者之教。先生雖海

孺司鐸耳。而四方學人莫不聞其所著述。期皆足以信今傳後。於雜記備志外。嘗輯家譜及清芬世守錄。海昌學職未入考。詩文曰甘泉鄉人稿者。卷二十有四。咸豐壬寅海氛起。在海昌日讀書不輟。庚申粵賊陷杭。乃辟海鹽。匿跡深鄉。常緣疊陷。及嘉興猶守先塋。不忍去。子應溥自京師亟馳歸。乃請渡江行。痛哭告墓。至澈浦泛海。息餘姚。遷慈谿。賊再圍杭。破紹興。慈之村港火光徹宵。復倉卒登海船。賊上海。達九江。時辛酉歲暮矣。明年應溥為湘鄉相國招襄戎幕。迎奉養於安慶。於是先生老矣。自遭寇亂。頻年顛涉。江烽海濤。瀕涸之餘。而神明迄未衰。居則校讐經史。猶日有程。湘鄉幕府。東南彥會所集。先生至而樂之。謂鄉中無有也。癸亥十一月。官軍復蘇州。語應溥曰。我其可歸守先隴乎。時已病甚。踰月乃卒。年七十三。子二。長炳森。道光甲辰舉人。為先生兄友。泗後先卒。次即應溥。以己酉選貢朝考。用吏部小京官。陞主事。軍機處行走。拯與應溥同直友善。以先生年譜郵京師。乞傳志。希可辭。嗚呼。我朝監於明季學術之蔽。國初大師實事求是。漸為有用。比末流蔽又生。求能勸學明先緒者。蓋亦希矣。拯於先生觀所著述。數其懇懇問學。而見其大不遺其細。抱其殘闕。參互考訂。而盡歸於本原。孝友。虛心實力。以畢世而不移。故樂敘其學行。以為之傳。且與天下為學人者同質論焉。馬平王拯撰。

跋胡農部河南余氏服議後

陳立

研六室雜著戴寶豐余氏事曰余氏兄弟二人長成江次成海成江無子成海生子篤生出嗣成江成江不忍成海無子令篤生承嗣兩房各為娶婦長房娶婦張氏無出繼娶王氏生子萬全即承長房之嗣二房娶雷氏無出納妾杜氏生子萬德承二房之嗣雷氏沒萬德丁嫡母憂時有以萬德宜比慈母之例持服三年者胡氏駁之以為不合謂宜服庶母之服案禮喪服之慈母謂妾之無子者妾子之無母者父命以為母子則服之三年貴父之命也今萬德尚有生母杜氏則非妾子之無母者雷氏為次房所娶則非妾之無子者無父之命而同諸慈母是証父也則謂持慈母之服者其謬誠如胡氏所非然胡氏例諸庶母則又楚失之而齊亦未為得者也禮士為庶母總麻三月晉賀循云庶母士父之妾也服總麻朱子曰父妾之有子者禮經謂之庶母今律然則此必嫡母子為庶母之服故大夫尊則降而無服喪服傳曰大夫以上為庶母無服是也今萬德係妾杜氏所出則非嫡母子也雷氏無出則非有子之妾也烏得服以庶母服歟胡氏又謂就使萬德承嗣二房雷氏為二房所娶於萬德有養育之恩亦止為加服小功服君子子為庶母慈己之服可耳案傳曰君子子者貴人之子也為庶母何以小功也以慈己加也則亦即總麻章之庶母以慈己

故加至小功。故馬融曰：貴人者，嫡夫人也。子以庶母慈養已，加一等小功，是也。若雷氏六禮胥備，儼同敵體，父不敢以為妾，而子敢以為庶，不同一誣其父乎？其生母杜氏，本妾也，而同之於嫡，不更亂嫡妾之分乎？總之，獨子兼祧，古禮所無，然既為律所不禁，若仍科以古禮，勢不得不窮。則當於失禮之中，求其禮之近於正者也。考公羊傳曰：不以父命辭王父命，以王父命辭父命，是父之行乎子也。又喪服傳曰：禽獸知母而不知父，野人曰：父母何算焉？都邑之士，則知尊稱矣。大夫及學士，則知尊祖矣。篤生以一身嗣兩房，則雷氏者，成海之嫡婦，而萬德為成海承嗣之孫，安得不以雷氏為嫡母？其萬德之以嫡母丁憂，固未為失也。蓋萬德與萬全所承各異，父則一而祖則二也。匹嫡固禮所不許，而誣祖尤禮所不容。權乎失禮輕重之間，蓋避重而就輕乎？不然，其祖以為嫡婦，其父以為嫡妻，父秉命於祖者也，而子顧反庶之乎？就如所論，則必不為雷氏服而後可。必如雷次宗、庾純無子立孫之議，去其一子兼祧之俗而後可耳。然則篤生當何服？曰：禮無貳斬，服成江以為人後者之服，服成海以本生之服耳。何也？至親以期斷，特去其加隆焉耳。然則萬全將何服？曰：此又禮之變也。其如世叔母服期乎？其長房王氏、張氏沒，萬德殆亦猶是耳。

武陵水災記

胡焯

道光十一年夏五月大雨。水漲五溪。合注武陵。溢南岸隄。浸村野。十三日甲子晨。決北岸隄。自河狀山以東至城西。決者數十處。西城東一里外。同時亦決。盡大野滿。而為湖水。水之決於城西也。若干萬雷霆兵車甲馬之聲。磅礴觸擊。不可言狀。覆舟拔屋。疊壓以下。環西北城。屋盡壞。人漂沒不可計。騎屋據樹。附器具隨水浮沈者數百人。呼號痛哭。慘不忍聞。流益急。小舟不得進。知縣墊江盧君步巡城隄。竟日徹夜。及旦。命役乘巨舟。自所潰以入。拯之。時門當水者閉。自城堞繩引而入。邑有力者相率濟以巨舟。於是邑令使諸避水露處城市者。分居諸僧寺。飯以米。會舉人鄉貢諸生督吏胥給之。越三日。置釜竈為粥以食。故雲貴總督邑人文恪趙公建預備倉。其子敦訓敦詒以其穀為粥。更益以家貲。官所置之地二。趙所置之地三。是時城西北至東北隅有傾圯者。盧君率役會兵民設版築之。東北城水實。水湧入勢急。使善沒者入水。以布囊盛土塞其竅。而雨方不絕。城以內積至數尺。水益洶湧。衝齧其外。老幼男女億萬人相與痛哭。懼其遂沈也。官民相與奔走。禱於城隍壇社。請於提督會弁兵登城震火鎗以達陽氣。六月辛巳朔。雨止。水勢減。眾乃稍定。於時城西十餘里河決車喬村。城東十里德山。各有富者主置粥事。而逃生民日漸集。入城者數萬餘。其以

餅餕米錢藥物予人者各視其力官之置粥也邑紳民暨商旅宦遊者各輸貲助焉文恪從子敦讓與桃源候選訓導子頤乘舟率沒入出溺屍為棺數千並病斃者斂葬之湖南布政使南海吳公來視災察數邑患之淺深別其令之賢否而勲賞之問其士民之能卹患者而獎之自武陵還以狀聞巡撫右副都御史請於朝蠲租賑糧給屋貲遂募壯者築隄以次舉其事秋七月既給賑止置粥於是水漸落民各求其居止土田補植諸穀為終歲計當水之至也逃生者以得免溺亡為幸而流離散失飢寒病困以至於死者又不可數計凡此耳不忍聞目不忍見之狀何可勝言耶黔蜀之交羣山萬壑匯為五溪同入於沅水納諸澗谷分合數郡二千餘里以至武陵東入洞庭洞庭合沅澧三湘之水北入大江大江之水自巴蜀出羣陵越江陵泛溢以下勢橫拒而不相受湖壩土地漸墾堤防日逼泥沙又從而壅之瀕湖郡邑歲受其厄武陵塞五溪之衝惟恃隄防以為固而下流無可疏通羣流灌注而下洪潦為災遂至一決而不可禦當此之時禦變於倉卒而拯其危急又為之籌策以善其後朝廷大吏論卹災者以武陵為得所蓋知縣盧君之勤能縣人士之樂義皆不可沒也至於疏通湖流決去壅塞俾湖濱群邑永無潰決之患則又必有賢士大夫斟酌而行之者矣

關幽彙記序

方東樹

馬君公賁著明季殉節附記若干卷。命其友方東樹為之序。馬君是書於殺身成仁之義。國家殊恩褒善之宏。及己所以欲搜補之意。既自具論其事。作為序例詳矣。思欲賡續大義。而識卑學陋。弗克當其職。而措其辭。久之乃似有以得其本末之實。爰始敢為之說。竊附於君子尚論之義焉。曰。吾讀明紀至熹宗。數其政刑之僨。奄寺媚嫉傷善之徒。接迹居位。雖以莊烈愍皇帝之恭勤思治。終亦蔽於賢奸之不分。故致忠良凋盡。國無與立。獨其下禮教信義之俗。愈挫愈明。在位者既以身殉國。一時士君子及閭閻之義民。號呼感憤。捐軀捨命。卒不忍渝其守。欺其志。以殉節義者。無地無之。以余所見稗乘野錄及各私家文集所記。為正史所不載者。不可勝紀。蓋比于東漢之末季。實猶過之無不及焉。宋文丞相之死。柴市也。自銘其衣帶云。孔曰成仁。孟曰取義。讀聖賢書。所學何事。嗚呼。諸君子其於讀孔孟書。而克以成仁取義也。固信不虛矣。論逆閹之禍。艾黨禍之株連。繼之以姦臣之翦剔。不應有此也。然卒得之。斷喪酷烈之餘。而其多且若是。非必士氣部民風厚也。蓋亦有所由致焉。當春秋時。亂臣賊子滋起矣。孔子懼。作春秋。述先王之道。明仁義之統。魯衛之君不能用。退而以其說教於洙泗。化其道者七十餘人而已。陵夷至戰國。俗益陷溺。孟子荀卿當亟

明之而其說卒不著。漢興一二大儒始稍稍明之。而政教不純。豪傑之士少。不能特拔於流俗。東漢光武首崇儒經。明章以來相繼表揚。立政造事。致法就功。大臣陳諫于君。悉引經術為斷。教明於上。習成於下。故致一代風俗之美。獨隆千古。自是以來千有餘年。經訓雖存。世主或莫知其可用。學者復蔽於傳注。無復有能明于先王之教以陶世者。宋儒出。乃實始講明切究。楊推而發揮之。然後孔孟仁義之道大明于世。雖婦人孺子。盡疾之夫行可不逮。而君臣父子之大倫。仁孝忠順之大節。莫不概乎有以湛于其心。明高皇即位。首延禮儒臣。宋景濂方希直等以率師表。優厚諸生。親幸太學。與諸生會食。繼世未幾。靖難兵起。而忠臣義士殉國捐生。義動海內。魏晉以來未之有也。孔孟之道明。仁義之教洽也。嚮非程朱諸儒講說之詳。有以啟沃其心。使之素知節義之為重。何由得此。乾隆間黔人謝濟世上書稱明人之尊朱子。以私同姓。故因請以其所撰經說易朱子傳注。誕妄之人。事不足論。唐人尊老子。則真為同姓也。而其治若彼。則即謂明人以私同姓。故尊朱子。而收效若是。亦足矣。又何歎乎哉。三代以降。更姓易號者不一矣。而政教休明。克稱一代之宏規者。曰漢曰唐。曰宋曰明。顧漢人尚黃老。唐人崇道教。惟獨東漢及宋明人克明儒術。所以邁絕古今。而足為萬世法者。在此。世之鄙儒。乃猶痛詆道學。力攻程朱。甚且以明之亡。歸咎

於講程朱之學。是烏知天下古今得失之大數乎。韓子曰。人之將死。其臟腑必有先受其病者。引繩而絕之。其絕必有處。觀者見其然。從而尤之。其亦不達於理矣。自古實多亡國。而明之亡。獨致節義之美。如是。吾故為推其所由。致以歸於孔孟仁義之教。程朱講辨之功。其誰曰不然。往者吾宗望溪先生。言華亭王司農之承修明史也。於吳會人士。雖行誼無甚異者。多列傳。而他省遠方。灼灼在人耳目者。反闕焉。又曰。秀水朱竹垞得復杜姓氏錄。以其後事徵之。死于布褐而無聞者十之三。是則地處僻遠。而史不及書。名位卑微。而史又不及書。如余向所稱見於野錄。裨乘及私家文集者。不知何限。而猶恐未盡。然則馬君之勤勤焉。旁搜博稽。思欲以顯微闡幽也。亦惡可已哉。

書法言後

退之論文。屢稱楊子。而不及董子。蓋文以奇為貴。而董子病於儒。聞之劉先生說如此。然竊以為退之所好。楊子文亦謂其賦及他雜文耳。若法言太元理淺而詞艱。節短而氣促。非文之工者也。退之所好。不在此。夫立言者。皆欲其不棄矣。而不能為不可棄者。理不當而辭不文也。文其辭而無當於理者。有之矣。未有當於理而其辭不文者也。楊子徒知為不可棄。而不務培其本。畢生用力造字句已耳。或曰。楊子成太

元桓譚以為後世復有子雲者必能好之。及宋司馬溫公果篤嗜其書。意者其與而世鮮知耶。余曰不然。夫孟荀楊韓雖並稱然孟氏之道班於聖人。今讀其書充然沛然高下曲折涵天地而無極。指事而無不盡焉。曷嘗待於人。黃泉出青天若楊子之所為耶。夫以楊氏書與孟氏相比差等殊絕。若河潦之不可同觀。如彼而司馬氏猶非孟子而尊楊子。是尚得為知言乎哉。

與陳頌南書

張穆

先生以直諫聞天下。天下仰望風采。以一瞻顏色為幸。即如敝鄉人士。素木強不工應酬。今且顧為先容。通刺相謁。盛名難副。詎可不力自振刷。慰天下仰望之心乎。竊見先生年來。日以招呼名士為事。苟有聞於世。必宛轉引為同類。從無閉戶自精讀書味道之時。穆蒙不棄。不四五日。輒示過。乃不聞以新知相賂。所談者皆泛泛不關痛癢之言。何以自了。深為先生懼之。當今天下多故。農桑鹽鐵河工海防民風土習。何一事不當講求。先生富有藏書。經學既目荒廢。治術又不練習。一旦畀以斧柯。亦不過如俗吏之為而已。古今必無徵倖之名臣循吏也。願稍斂徵逐之迹。發架上書。擇其切於實用者一二端。窮原竟委。單心研貫。一事畢。更治一事。然後於朋友中明白事理如印林伯厚比者。相與討論之。如此則取友自然不濫。他日出而宰世。亦不至貿貿而行。令人有言行不相顧之疑也。度今天下更無以直言貢執事者。過承厚愛。故敢竭其狂瞽。惟亮鑒千萬。

書汪馬二秀才事

管嗣復

汪君星垣。性好清靜。屏居清涼寺。僧報曰。賊至矣。君危坐不為動。為賊所執。僧給賊曰。是吾廟中供養除者也。賊將釋之。君厲聲曰。否。我秀才汪某也。賊以戈擬其喉。僧給賊曰。是有心病。君厲聲曰。否。我無病。我秀才汪某也。賊奇而禮之。且曰。我視君非凡人也。髮斑白矣。猶困於諸生。方今天下大亂。豪傑有為之時也。盍變計從我乎。君大罵曰。我所以困躓者。為不肯變計詣俗也。况肯變計從賊乎。遂遇害。氣垂絕。猶自呼殉難者上元縣秀才汪某也。同時又有馬秀才者。販牛為業。素不齒於鄉里。聞城陷。慨然誓死。謂其弟曰。吾聞功不在大。吾與若匹夫也。殺一人而死。足以自償。若殺二人。則是為國殺賊而死也。可謂立功矣。因跪迎賊入。使其弟守外戶。乘賊不意。取所用屠刀潛殺之。投其屍於井。賊續至。復然。日殺四五輩。以為常。既謂其弟曰。我有罪而不使人知。不武。因榜賊首於門。為他賊所知。覺遂與其弟俱遇害。論者謂汪秀才順受其正矣。然不如馬秀才立功為尤難。此記者所謂以義為利者也。

讀蔡仲之命

彭昱堯

武庚以亡國之餘而冀死灰之然。枯槎之蘖。亦通亡敗虜所冀倖萬一者。管叔以興朝之懿親。監勝國之孽子。使武庚蠢動恢復。淮沔洛邑之衆擁武庚乎。擁管叔乎。不待智者而知其不然也。夫歸本朝不失茅土之封。附武庚不過列侯之賞。其敗也則莫保其首領。流言而去一周公。二公固無恙也。於周無損。於叔亦何所利哉。余故以爲流言者。武庚所以間周家君臣骨肉之間。而俟其釁。管蔡異懼。不能制其力。發其姦。而其命已懸於武庚之手。故隱忍而從叛。然其罪已不赦矣。然謂周公殺管叔則不然。流言始於金縢。居東二年。非東征也。及爲鴟鴞之詩。以貽王。其詩曰。鴟鴞。鴟鴞。既取我子。無毀我室。蓋以鴟鴞比武庚。以我子比管蔡。憂武庚之既煽三叔而危王室也。然則流言本武庚之謀。而管蔡爲武庚所脅。已察於居東之年矣。且武庚首禍。管蔡脅從。嘗徵之大誥。其言曰。知我國有疵。民不康。曰予復。是武庚乘流言之隙。而後發也。惡有小腆未興。流言乍起。周公遽殺其兄之理哉。夫大誥爲東征之辭。其言祇斥武庚而不及管叔。意是時管叔已死。故邦君庶士之憚於征者。爲武庚飾過。而推其所由曰。亦惟在王宮邦君室。若管叔而在。持重畏惠之人。必更有所藉口。以遏王師之東。而服委婉其辭也邪。常棣之詩。周公閔管蔡失道之所作也。其詩曰。凡

國朝文匯

卷十八

二十四

國學扶輪社印

今之人。莫如兄弟。蓋遭人倫骨肉之變。故多死亡悽惻之音。世有殺兄誅弟而復悽惻於兄弟者。必無之事也。逸周書謂管叔自縊死。蔡仲一篇。偽書之必不可信者也。陳賈好誣聖人。如偽書所云。豈不以周公殺兄為不仁之確證哉。